

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 70, No. 1388

原始資料: CBETA 人工輸入, CBETA 掃瞄辨識

No. 1388-A

夫子曰。予欲無言。又曰。天何言哉故大上無言。其次立言。言所以載道。不以言求道。而□以心會道。抑末矣。夫□非想藥法皆空。釋氏之教也。環溪以其學於夫子者。逸而云墨。蓋將晦其光。泯其用。而求其所謂寂滅云者。所至一話一言。其徒記而錄之。既彙而成編。則請余為之序。猶記環溪在黃龍日。每訪余山中率靜坐寡言。其後日邊再會。簡嘿過於前時。知其非以口耳為學者。又非挾所有以銜於世者。然則環溪之有語錄。贅矣。而余復序之。抑又贅矣。後□欲識環溪者。當以環溪求環溪。毋徒以語錄求環溪云。歲在癸未浴佛日。抗山寓叟章鑑。書于所寓之溪堂。

環溪和尚語錄目錄

卷上初住建寧府瑞巖禪寺語錄

臨江軍瑞篁山惠力禪寺語錄

隆興府泐潭山寶峰禪寺語錄

隆興府黃龍山崇恩禪寺語錄

建昌軍資聖禪寺語錄

瑞州黃檗山報恩光孝禪寺語錄

袁州仰山太平興國禪寺語錄

福州雪峰崇聖禪寺語錄

慶元府太白名山天童景德禪寺語錄

卷下小參

拈古

頌古

普說

法語

佛祖讚

偈頌

題跋

小佛事

自讚

行狀

跋

環溪和尚初住建寧府瑞巖禪寺語錄

參學 覺此 編

師於淳祐六年良月入院。指三門云。盡大地是門。橫開豎闢。通霄有活路。七穴八穿。諸人到這裏。切忌容易進步。何故。不見道。入門問諱。

佛殿。黃面瞿曇。有沒量罪過。瑞巖因甚禮拜燒香。一任傍人道短長。

方丈。從上諸佛諸祖。於無窠窟中。做成窠窟。活陷平人。無出氣處。瑞巖今日從頭剖析。盡底撤開。向空劫已前。與諸人相見。莫有俊快底麼。良久。三十年後。

拈衣。自曹溪已後。法周沙界。衣止不傳。且道。此衣從甚處得來。西天鷲嶺。東土黃梅。

法座。此座高廣。吾不能升。淹彩殺人。[仁-二+斬]惶殺人。今日快便難逢。為他拔本去。遂驟步登座。拈香云。此一瓣香。爇向鑪中。恭為。

今上皇帝。祝延 聖壽。萬歲萬歲萬萬歲。次拈香云。此一瓣香。奉為 判府節制都運大卿。暨闔府尊官判縣郎中。資陪祿筭。次拈香云。此一瓣香。懷藏久矣。從上佛祖。尚討頭鼻不著。諸方老宿。怎知氣息有無。遍游湖海三十年。惟有無準較些子。今日當陽一爐爇却。初非報德酬恩。且要熏夫炙地。遂跌座(問答不錄)乃云。釋迦不出世。盡大地人。成佛多時。達磨不西來。亘塵剎海。談禪不歇。恁麼會得。便知一上座。未離徑塢。已與扣冰古佛。赤體相挨。今到瑞巖。元共國一祖師。眉毛[病-丙+斯]結。溪山有異。雲月是同。既然雲月是同。說甚溪山有異。直得車書混一。天地清寧。一人高拱無為。萬國咸歸至化。且太平無象一句。作麼生道。但見皇風成一片。不知何處是封疆。

復舉僧問曹山。佛未出世時如何。山云。曹山不如。僧云。出世後如何。山云。不如曹山。師拈云。大小曹山。名喧宇宙。氣衝牛斗。恁麼答這僧話。直是未在。今日或有問新瑞巖。佛未出世時如何。瑞巖不如。出世後如何。不如瑞巖。須是恁麼始得。

當晚小參。明鏡當臺。妍醜自現。吹毛在手。殺活臨時。恁麼恁麼。南斗東轉。北斗西移。不恁麼不恁麼。冬月震雷。夏天灑雪。多添少減。與有奪無。不墮平常。獨超象外。只如恁麼中不恁麼。不恁麼中却恁麼時如何。良久云。無人知此意。令我憶南泉。

復舉台州瑞巖彥禪師問夾山云。與麼即易。不與麼即難。與麼與麼即惺惺。不與麼不與麼即居空界。與麼不與麼。請師速道。山云。老僧謾闍黎去也。彥喝云。這老和尚。而今是什麼時節。便出去。後有僧舉似巖頭。頭云。苦哉。將我一枝佛法。與

麼流將去。師拈云。瑞巖逞俊太過。元不知有佛法道理。因甚。巖頭却道。苦哉將我一枝佛法與麼流將去。且道。是肯他不肯他。

留兩班上堂。是法住法位。世間相常住。佛殿對三門。燈籠掛露柱。移易一絲毫不得。增減一絲毫不得。或有个出來道。長老昨日是孟冬月晦。今日是仲冬月旦。夜愈長晝愈短。日月更相換。如何說箇不移易不增減底道理。只向他道。瑞巖寺裏。知事頭首。昨日不少。今日不多。增減得麼。各安己分。各務本職。移易得麼。不見古人有言。不愆不忘。率由舊章。

上堂。浴水橋畔。伏虎巖前。雪消松杪。春到梅邊。古佛眼睛突出。瞿曇面目昭然。認著依前隔大千。

佛成道上堂。夜夜明星現。有眼誰不見。此夜老瞿曇。却被明星轉。直至而今双眼花。無瑕白玉自生瑕。

謝兩班上堂。法無定相。遇緣即宗。如水在地。如雲行空。或卷或舒。或西或東。鼓際天雲濤。而有江澄練淨底消息。沛翻盆驟雨。不無天開日霽之形容。其用也不有其德。其寂也不居其功。且道。是什麼物。得恁麼靈。良久云。任從滄海變。終不為君通。

元宵上堂。和暖上元天氣。是處笙歌動地。瑞巖無可設施。隨分放燈一二。以拂子作彎弓勢。依稀初月。又點三點。彷彿三星。輝映群芳。光吞萬象。毗嵐遍界。不能息滅。金蓮萬斛。未易比方。焰焰熾然。明明無盡。然雖如是。汝等諸人。折旋俯仰。動轉施為。總在這箇光明藏裏。因甚十箇有五双。面前黑漆漆地。以拂子擊禪床云。只為分明極。翻令所得遲。

上堂。今朝十五。明朝十六。瓠苦瓜甜。松直棘曲。辟支老漢。炎夏衣楮。嚴冬浴水。謾自辛勤。徒勞檢束。爭似而今禪和。三三兩兩。水邊林下。寒向火。熱乘涼。又誰管你地覆天翻。天翻地覆。雖然如是。是玉也大奇。只恐不是玉。

上堂。露冷風清。山空月明。天際歸鴻書梵字。夜深砧杵送秋聲。眼觀不見。耳聽不聞。與君傾盡此時心。莫認山河作眼睛。

古佛忌上堂。伏虎巖前。螺江江上。一去一來。無去來相。諸人要識無去來相麼。良久云。今朝古辟支。昔日翁和尚。

謝兩班上堂。權衡佛祖。號令人天。擒縱予奪。各得其宜。進退存亡。不失其正。要明如是事。須是如是人。既得如是人。方明如是事。如是事則且置。我此一眾。還有如是人麼。鸞鷲麒麟皆是瑞。旃檀薔蔔一般香。

上堂。微雨潤枯菱。嚴風攪林木。梅唇已破香。柳眼眠未足。塵世競奔忙。光景相追逐。林間無事人。好唱雲門曲。只如雲門曲。作麼生唱。良久云。今朝臘月二十五。明朝臘月二十六。

上堂。今日上元令節。雨意連綿未歇。過去燃燈如來。全體一時漏泄。諸人還見麼。簷頭滴滴。分明歷歷。

上堂。人人頭頂天腳踏地。眼裏放光。鼻孔出氣。缺齒老胡。何用單傳直指。宜乎打落當門齒。雖然如是。不因樵子徑。爭到葛洪家。

上堂。拈拄杖召大眾云。山僧。從春及夏。袞袞地過。殊無一言半句資益諸人。子細思量。恁麼住山。誠然無益。昨日偶因無思惟中。得个三昧。頗似奇特。今朝擊鼓陞堂。舉似諸人。也要大家知有。惟是諸人。得此三昧。善自護持。百劫千生。莫教忘却。卓一下云。會麼。大事為你不得。小事各自祇當。靠拄杖下座。

出鄉歸上堂。建嶺雲。建溪水。縹緲無邊。淵深無底。盡情收拾歸來。點滴無非珍貴。拋向諸人面前。切忌自生擬議。何故。見之不取。思之千里。

上堂。禪禪。風生木杪。葉墜庭前。唧唧寒蛩吟破壁。聲聲歸雁度遼天。諸人。若也會得。此去吳屯不遠。若也不會。藍溪水透洋邊。阿呵呵。笑倒武夷張大僊。

上堂。皎潔中秋月。清光處處同。是人皆照破。無水不形容。圓滿纖塵淨。婆娑桂影。重古今爭賞翫。誰到廣寒宮。莫有曾到底麼。良久云。三生六十劫。

九日道舊至上堂。舊日重陽。今日重陽。籬菊披金淺淺黃。休訝去年蓬鬢。今歲半成霜。喜得同人相訪。那邊風景。此間風景。且莫論量。相與對花賒一醉。高歌大笑。手舞足蹈。聽教人道掣顛狂。因甚如此。不見道。有朋自遠方來。不亦樂乎。

開爐上堂。拈起拂子召大眾云。這些火種。混沌未判。威音未生。光燠赫地。已難掩遏。無端被迦文老漢。指天指地。從而噓之。菩提達磨。逾海越漠。扇而東之。賣柴漢子。拖一束薪。發而揚之。由是。東西浩浩。南北紛紛。千種施為。萬般作用。欲彰之而深晦。欲益之而浸微。逮至今日。或幾乎息矣。東山試向冷灰裏。打一撥看。以拂子劃一劃云。見麼。雖然煙焰無多子。近著須防燎面門。

古佛忌日上堂。虎溪水瑩長空月。鳳嶺松吟後夜風。堪笑堪悲翁老子。儼然不改舊時容。諸人還見麼。遂拖拄杖下座。

上堂。可祖齊腰立雪。長慶坐破蒲團。一人鐵壁覷要透。一人滄海瀝須乾。鐵壁透滄海乾。出禮三拜依位立。捲起簾來天下寬。堪悲堪笑。何易何難。信道梅花香撲鼻。須是徹骨一番寒。

元宵謝綺都寺上堂。羅綺叢中。笙歌社裏。燈明如來。放光現瑞。諸人還見麼。良久云。過去久矣。

謝執事上堂。東山開箇小小戲場。編排佛祖拈弄不到底科段。然而單絲不成線。獨掌不浪鳴。須是諸人大家。攬掇始得。所謂唱底唱。拍底拍。絲竹互奏。金石交陳。山僧贏得。於其中間。舉其宏綱。撮其機要。卷舒進退。開闔翕張。或現鬼面神頭。或伸佛手驢脚。千變萬化。七縱八橫。傍人看來。只眨得眼。且道。是神通妙用。法爾如然。還會麼。不見道。但看棚頭弄傀儡。抽牽總在裏頭人。

上堂。秋風捲地。秋水連天。千山影瘦。萬木蕭然。漁笛數聲江上月。樵歌一曲嶺頭烟。諸人聞恁麼告報。切忌作境話會。既不作境話會。畢竟作麼生會。良久云。佛身充滿於法界。普現一切眾生前。

敘謝監寺藏主知客直歲寮元侍者上堂。楊岐三脚驢。虎丘睡虎子。毛色既一同。蹄爪亦相似。祖域交馳。卒難構赴。須是具客來則接。賊來則打底手脚。有插鋤而立。携鋤便行底機用。方可恰恰相當。其或未然。犀牛扇子起清風。披拂旃檀香滿空。

上堂。拈拄杖召大眾云。火爐頭有則無竇主話。自古自今。浩浩商量。商量不下。瑞巖有舌如結。有口如啞。且聽。拄杖子。為諸人分明說破去也。卓一下云。上下三指。彼此七馬。

上堂。召大眾云。達磨西來。踰海越漠。遊梁歷魏。明什麼邊事。良久云。會麼。知我者。謂我心憂。不知我者。謂我何求。

住臨江軍瑞篁山惠力禪寺語錄

參學 編

指三門云。無礙慧門。鐵壁鐵壁。一擊擊開。不勞餘力。幾人把手拽不入。

踞方丈。橫一丈。豎一丈。滿室風生。半窻月上。山僧要坐便坐。要起便起。終不向這裏無風起浪。諸人若不散去。照顧劈脊拄杖。

陞座。祝 聖罷(問答不錄)乃云。目視雲霄。有一拳未敢分付。日遊鬧市。三十棒且待別時。遇坎則止。乘流而行。既無跡於去來。寧有心於動靜。昨日恁麼。逸翮獨翔。孤風絕侶。今日不恁麼。翫江月。聽松風。拈起閤皂山。濃蘸清江水。平展金鳳洲。寫出祖師意。貼向十字街頭。俾人人知道。一年十二月。臘月是年尾。寶祐改元。又從頭起。萬年萬年更萬年。清江依舊清無底。然雖如是。道泰不傳天子令。時清休唱太平歌。

復舉南。泉示眾云。王老師。自小牧一頭水牯牛公案。師頌云。不如隨分納些些。何處青山不是家。玉笛橫吹皇化裏。風前清韻徹天涯。

當晚小參。入作無門。面前如鐵壁。放開線路。水上按葫蘆。如轉輪藏。八面玲瓏。轉轆轤地。了無滯礙底時節。如觀空閣。十方通暢。虛豁豁地。了無窒塞底時節。既無窒塞。又無滯礙。無往而不通。無施而不可。縱橫得妙。舒卷無拘。正當恁麼時如何。良久云。今朝有酒今朝醉。明日無錢明日愁。

復舉德山小參不答話公案。師拈云。行險僥倖。德山始終不移。強毅果敢。這僧危亡不顧。惠力也有箇見處。當時待德山道今夜小參不答話問話者三十棒。出眾呵呵大笑。教這老漢。要開口也不得。要合口也不得。要坐也不得。要起也不得。然雖如是。還契德山意也無。具眼衲僧。試甄別看。

留知事頭首上堂。山僧自入院以來。終日忙忙。遍地人事。欲求前日清閑。豈可復得耶。所幸眼睛鼻孔。元只依舊。三門對佛殿。厨舍對僧堂。也只依舊。僧是僧。行是行。東者東。西者西。也只依舊。然雖如是。且道。斬新號令。又作麼生。去年梅。今歲柳。顏色馨香依舊。

滿散天基聖節上堂。惠力大寶藏。日轉萬億市。一日萬億市。千日千萬億。願以轉輪數。仰祝 天子壽。惟願 天子壽。復倍轉輪數。繁開玉葉茂金枝。永與法輪無盡時。

佛涅槃上堂。翠柳堤邊舞。黃鸝樹上鳴。瞿曇真實相。歷歷在而今。誰言入滅向双林。

無準和尚忌拈香。這箇老漢。殊無所解。不惟屈屈曲曲。且是頑頑賴賴。我昔沒興見之。直至而今耐耐。燒炷香。禮三拜。喫拳打拳。彼此莫怪。

結制上堂。今朝結制。號令宜先。三章約法。普示人天。身不可妄動。亦不可塊然。口不可妄開。亦不可默然。意不可妄舉。亦不可罔然。依如是行如是住。圓覺伽藍常現前。

謝秉拂上堂。獅子吼無畏說。百獸聞之皆腦裂。如是則石龍恐怖。金鳳來儀。蕭水騰波。瑞山業萼。不為分外。雖然。且道。昨日第一座。與第二座說法。還有優劣也無。良久云。藏頭白海頭黑。

上堂。晝也惺惺。夜也惺惺。既不掉舉。亦不昏沉。何須求白玉。只此是黃金。

上堂。召大眾云。從上諸佛諸祖。千種施為。萬般方便。只要諸人知得。冬寒夏熱。夜闇晝明。三旬一月。一月三旬。以拂子擊禪床云。會麼。頻呼小玉元無事。只要檀郎認得聲。

開爐上堂。夏熱乘涼。冬寒向火。自古自今。總恁麼過。不知二祖立雪齊腰。畢竟圖箇什麼。良久云。會麼。以吾之不可。學柳下惠之可。

上堂。無禪不參。無道可學。只貴諸人如醉而醒。如夢而覺。醉既醒。夢既覺。雖然只是舊時人。却與舊時相遼邈。

住隆興府泐潭山寶峯禪寺語錄

參學 編

指三門云。從上諸佛諸祖。皆從此門而入。且道。如何是此門。良久云。有人動著關棧。兩扇東扇西扇。

佛殿。德山拆殿。寶峯燒香。二俱不惡。一種不滅。瞿曇元自面皮黃。

陞座。祝 聖罷(問答不錄)乃云。法無定相。遇緣即宗。至道無難。惟嫌揀擇。真如不守自性。隨緣應用萬差。高謝古劍津。垂楊兩岸。一片沙鷗。管領獨秀峰。滴翠千尋。羣飛野鴨。廣漢簸箕拈起。東簸西簸。關西水磨試把。左推右推。贊化育於兩

間。致昇乎於四海。普天和氣。匝地春風。正恁麼時。功歸何所。良久云。千峯朝華嶽。萬派肅滄溟。

復舉三聖道。我逢人即出。出則不為人。興化道。我逢人即不出。出則便為人。真淨云。這兩箇老古錐。竊得臨濟些子活計。各自分疆列界。使明眼衲僧。只得好笑。師云。真淨恁麼批判。只見錐頭利。不見鑿頭方。亦使明眼衲僧。只得好笑。殊不知二大老。兄不兄。弟不弟。自相矛盾。喪盡臨濟門風。新寶峰恁麼批判。且道。還免衲僧笑麼。具眼者辨取。

當晚小參。泐潭之潭。澄澄浸月。寶峰之寶。焰焰發輝。親到此峰。必獲此寶。既獲此寶。直須擊碎。不留影迹始得。親到此潭。直須吸乾。了無涓滴始得。然後。於無涓滴處。興雲作雨。霑溉大地草木。而不作霑溉之想。於無影迹處。開無盡藏。賑濟一切貧窮。而不起賑濟之念。便見貧窮富足。草木敷榮。無一物不遂其生。無一夫或失其所。然雖如是。忽被山僧拂子。將泐潭寶峰。一口吞却。是汝諸人。向甚處安身立命。以拂子擊禪床云。切不得離却這裏。復舉馬祖大師。因僧問參次。祖畫一圓相云。入也打。不入也打。僧纔入。祖便打。僧云。和尚打某甲不得。祖靠拄杖休去。師拈云。馬祖畫出這個圈子。盡大地人跳不出。這僧恁麼祇對。且道。還跳得出麼。

留兩班并謝新命日光長老。上堂。召大眾云。萬般施設不如常。又不驚人又久長。山僧自入院以來。傷風咳嗽一般。無可施設。喜得大寂祖師面目。元只如常。見前大眾。頭頂天腳踏地。元只如常。東邊底。辨取東邊事。西邊底。辨取西邊事。元只如常。日裏三飡。夜間一寢。元只如常。雖則如常。就中却有些子驚人處。昨朝陰雲四合。雨正霧霧之際。忽然一道日光。從南而下。把泐潭山千巖萬壑。透頂透底。一一融通。不知日光之為泐潭。泐潭之為日光。所謂其光遍滿。無壞無雜。見者聞者。歡喜踊躍。皆曰。希有之事。驚人之舉。雖則驚人。要且久長。如何見得。不見道。佛法無多子。久長全在人。

延慶佑聖二長老至。上堂。召大眾云。開門待知識。知識喜來過。兩兩不成雙。一一無回互。共臥不共床。同行不同步。昭然在目前。目前不可觀。雖則不可觀。我獨知其故。諸人還知麼。良久云。聖容菩薩來西天。盧仙夏人在東土。

再住寶峰上堂。雲無心而出岫。功不浪施。水有時而回淵。法無定相。行固不厭。住亦不忻。昨從主而為賓。去不出門。今從賓而為主。來不入戶。既不出門。又不入戶。明明來去無來去。歷歷主賓非主賓。泐潭元自碧沉沉。獨秀依前高突兀。然雖如是。只如再呈舊面。重理新詞一句。又作麼生。擊拂子云。拍拍是令。

謝管幹撥田上堂。舉東山演祖頌云。山前一片閑田地。叉手叮嚀問祖翁。幾度賣來還自買。為憐松竹引清風。老東山。雖則買賣自由。未上未免叉手問人在寶峰即不然。山前一片閑田地。無意求之却宛然。幾許風光都買盡。不曾費著一文錢。

解制上堂。今朝解制。且作麼生。從前約束。一槩放行。萬里秋天飛一鷗。東西南北任縱橫。

九月旦雲居歸。上堂。昨從天上去。元不離地下。今歸地下來。亦不離天上。上下無間。來去無差。天河秋一雁。砧杵夜千家。

上堂。十五日已前。即心即佛。十五日已後。非心非佛。正當十五日。不是心不是佛不是物。便恁麼會。頭上安頭。不恁麼會。斬頭覓活。總不恁麼時如何。良久云。丁人干千。上下十卜。

開爐日。白塔東山二老。并維那道士至。上堂。召大眾云。悅分忽。其中有物。是什麼物。忽分悅。其中有象。是什麼象。依稀鈿斧之既閑。彷彿砧槌之已放。泐潭不欲破二作三。重重起模畫樣。恍忽忽恍。置而勿論。物象象物。亦休定當。今日開爐。且燒火向。

佛成道日上堂。六年雪嶺竟無成。練得身形似鶴形。盡謂見明星悟道。何曾悟道見明星。入山何富。出山何貧。知心能幾人。

基首座本藏主昭侍者至。上堂。召大眾云。參禪學道。豎起拂子。此為基本。儻得基本。可以為人天眼目。作叢林表儀。演出一大藏。演入一大藏。無施不可。其或未然。布毛吹起處。子細好生觀。

佛涅槃上堂。拈拄杖。召大眾云。世尊最初於般若會上。垂教云。若以色見我。以音聲求我。是人行邪道。不能見如來。末後。却於涅槃會上。以手摩胷。告眾云。汝等。善觀吾紫磨金色之身。瞻仰取足。無令後悔。這老漢顯異或眾。前後相違。業既自作悔。不容追昔年。已陷泥犁去。卓一下云。今日重移過鐵圍。

上堂。春風料峭。春雨連綿。桃花逐浪。新竹籠煙。香巖已往靈雲去。一度春深一愴然。

上堂。召大眾云。乾坤之內。宇宙之間。中有一寶祕在形山。所謂髮毛爪齒。皮肉筋骨。髓腦垢色。皆歸於地。唾涕膿血。津液涎沫。痰淚精氣。大小便利。皆歸於水。暖氣歸火。動轉轉風。且道。寶在什麼處。良久云。桑疇雨過羅紈膩。麥隴風來餅餌香。

無準和尚忌日拈香。這老凍儂。惺惺懵懂。分明無一絲毫。剛道有三斤重。只知恁麼脫空相誑。不知其讎甚於戴天之不共。瓣香今爇夫何為願。百劫千生。永陷泥犁無出期。

城歸上堂。舉南禪師道。去時一溪流水送。歸來滿谷白雲迎。一身去住非去住。一物無情似有情。師云。大小南禪師。話作兩橛。既是去住非去住。爭得有送迎。寶峰即不然。去從鬧市紅塵去。歸向白雲深處歸。因甚更無迎與送。去來寸步不曾移。

上堂。召大眾云。細不可減。大無以加。近在眼睫。遠過天涯。是著即錯。擬之又差。缺齒老胡會不得。空携隻履返流沙。

端午上堂。以拂子書空云。五五午時書。妖邪盡掃除。一堂風悄悄。千古意如如。蒲飲先春雪。糗餐明月珠。舌頭如具眼。醉飽樂無餘。

中秋劔州生監寺綿州泰首座至。上堂。一月在天。影含眾水。只如雙劔峯頭月。何似芙蓉溪上月。蓉芙溪上月。何似泐潭潭底月。若道同。東西各一涯。若道別。天無第二月。既然如是。畢竟作麼生。不見道。白雲巖上月。太平松下影。深夜秋風生。都成一片境。

九日上方西堂至。上堂。召大眾云。今日重陽。寶峰相與諸人登高去也。所謂登山不到頂。不知山之高。然而未到高處。各宜努力。切不可如存若亡。直饒得到高處。一覽眾山小。舉手摩穹蒼。亦未可在。何故。更有靈蹤在上方。

延慶長老至。上堂。雨暗西山。雲飛南浦。老盧僂腰纏騎鶴。朝度黃茅八凸。獨秀峰草木泉石。為之鼓舞。因甚如此。家貧願隣富。

佛成道上堂。拈起拂子。召大眾云。瞿曇未解這一著。雪嶺六年空卜度。不知眼病見空花。認作明星一何錯。自累猶可。更累兒孫。擊禪床云。珊瑚枕上兩行淚。半是思君半恨君。

上堂。歲盡年窮。多少人脚忙手亂。惟有寶峰恬然不管。何故。來年更有新條在。惱亂春風卒未休。

住隆興府黃龍山崇恩禪寺語錄

參學 編

指三門。從上佛祖。建立這箇門戶。只要盡大地人。把手同歸。新黃龍又作麼生。不向如來行處行。

佛殿。我與黃面老漢。有千古不忘之恨。甚欲爛槌一頓。今日因甚放過。老不以筋力為能。

方丈。踞此室。坐此座。佛來祖來一一按過。莫有超佛越祖底麼。勘過了打。

陞香。拈香祝 聖罷。乃云。泐潭深處泛明月。棹穩波平。幕阜峰前對落暉。鳥啼花笑。此即彼。彼即此。拈又放。放又拈。打開石門於三關之前。巨關三關於石門之後。俾到者到不到之地。歸者歸無歸之鄉。已過關者。掉臂而行。未過關者。從門而入。益無所益。為無所為。鼓舞皇風。優游聖世。正當恁麼時如何。蒲團靜倚無餘事。永日寥寥謝太平。

復舉三聖問雪峯。透網金鱗。未審以何為食公案。師拈云。金鱗振鬣擺尾。搖蕩乾坤。鱉鼻噴毒揚威。崩騰雲霧。諸人要知二大老落處麼。等閑相見處。莫作等閑看。

當晚小參。我手何似佛手。十指參差。我脚何似驢脚。四蹄踏地。人人盡有生緣。如何是上座生緣。耳朵兩片皮。牙齒一具骨。恁麼會得。便見積翠老人面目見在。

時時與諸人。同一飲啄。同一受用。不背一人。不向一人。念念與諸人。向第二義門。談不二法。不住本際。不離本際。雖然如是。因甚十箇有五双。蹉過也不知。拍禪床云。只為分明極。翻令所得遲。

復舉黃龍南禪師問隆慶閑禪師。得坐披衣公案。

師拈云。積翠老人。何用繁詞。當初待他道。遇方即方。遇圓即圓。痛與三十棒。不惟彼此免帶唇齒。管取隆慶別有長處。

元宵興化兜率長老至。上堂。未離兜率。已降王宮。纔過一關。三關俱透。全寶全主。全主全寶。正恁麼時如何。樓臺上下火照火。車馬往來人看人。

慧日西堂蓬萊二道士至。上堂。以拂子畫一畫云。畫斷迷雲。打一圓相。放開慧日。照破老君肝膽。脫似瞿曇胸臆。一家胡越。一合乾坤。渾崙休剖破剖破。又渾崙。

上堂。拈主丈。召大眾云。諸人不是不將來。老僧不是不分付。將來既是分明。分付亦非莽鹵。且畢竟是箇什麼。擲下主丈云。各自認取。

上堂。目前無法。密密綿綿撥不開。意在目前。千討萬討討不見。討不見却成現。椶櫚葉散夜叉頭。芍藥花開菩薩面。

佛生日上堂。召大眾云。世尊初生下來。三業便不清淨。一手指天。一手指地。周行七步。目顧四方。身業不清淨。天上天下。惟吾獨尊。口業不清淨。起此念。作此說。為此舉。意業不清淨。因此三業不清淨。遂感異報。一年一度。受鑊湯之苦。還脫得也無。良久云。假使百千劫。所作業不忘。因緣會遇時。果報還自受。

謝秉拂上堂。雨注河傾。共談無義。陳蒲鞋倒退三千。睡虎子讓一頭地。有問如何若何。不能以手夾鼻。何故。切忌錯恠老僧。

上堂。涅槃心。差別智。明之既難。會之不易。如千手異執。千目異顧。元同一身。似萬派爭流。百川競注。皆歸一水。雖然如是。差之毫釐。謬以千里。

上堂。舉永嘉大師道。直截根源佛所印。摘葉尋枝我不能。與麼已帶枝葉了。作麼生得直截根源去。良久云。時暑不宜久立。

城歸上堂。昨日動未常動。今日靜未常靜。所以道。靜謂之性。心在其中矣。動謂之心。性在其中矣。只如心性俱泯。動靜兩忘時如何。一片白雲橫谷口。數聲幽鳥語林阿。

解制上堂。昨朝結制。鎖夢關空。今朝解制。眼開天曉。且道。結底是。解底是。孤鷺高飛趁落霞。長天一色如秋水。

請淨頭上堂。淨桶放光。籌子[跳-兆+孛]跳。為得諸人徹困了也。更教老僧說箇什麼。雖然如是。狼藉不少。

上堂。古佛心。即如今。桂香滿院。葉墜疎林。水沉寒雁影。露冷夜蛩吟。明眼衲僧會不得。江北江南徒訪尋。

上堂。舉德山一日飯遲。自托鉢至法堂上。雪峯云。鐘未鳴。鼓未響。托鉢向甚處去。(師着語云。妄起兵端)德山低頭歸方丈。(一鉢不施。折衝千里)雪峯舉似巖頭。(討兵救援)頭云。大小德山。未會末後句在。(挾天子令諸侯)德山聞得。令侍者喚巖頭問云。汝不肯老僧那。(一擒一縱)巖頭。遂密啟其意。(詐納降款)德山休去。(夫人既降。殺之不祥)山次日上堂。果與尋常不同。(其然〔次〕豈其然乎)巖頭於僧堂前。撫掌呵呵大笑云。且喜。老漢會末後句。天下人不奈伊何。雖然如是。只得三年。(恭而無禮。克由叵耐)師拈云。大眾。德山托鉢話。古今以為奇特商量。殊不知。這老漢飢過心荒。顛倒錯亂。被他二子上當。只得飲氣吞聲。雖然如是。若無舉鼎拔山力。千里烏騅不易騎。

上堂。今日如是。明日如是。一日復一日。一年復一年。百千萬億年。究竟只如是。月落烏啼霜滿天。紛紛黃葉飄庭際。以拂子擊床云。會麼。善男子起。法性如是。

天童化主入蜀。兼謝照都寺上堂。照而常寂。寂而常照。灩澦雲開。玲瓏月皎。巍巍玉殿與瓊樓。已見翬飛主丈頭。

聖節上堂。寶祐五年正月初五。天地泰而上下交。

聖人作而萬物覩。巍巍乎不可極。蕩蕩乎無能名。黃河三千年一度清。

上堂。舉洛浦遊歷罷。往夾山頂上卓庵。(師着語云。更須行脚始得)經年夾山知。乃修書令僧馳到。(箭不虛發)浦接得便坐却。再展手索。僧無對。浦便打云。歸舉似和尚。(門庭施設。似則也似)僧回。舉似夾山。山云。這僧看書。三日內必來。若不看書。斯人救不得也。(性命已在夾山手裏)三日後。果來。纔見夾山不禮拜。當面叉手而立。(強惺惺。棺木裏瞠眼)夾山云。雞棲鳳巢。非其同類。出去。(四十斤鐵槌。劈頭一下)浦乃云。自遠趨風。乞師一接。(一欸便招)夾山云。目前無閻梨。此間無老僧。(再下一槌)浦便喝。(伎倆已盡)夾山云。住住。且莫草草匆匆。雲月是同。溪山各異。截斷天下人舌頭。則不無。爭教無舌人解語。(截斷命根)浦佇思。(一死更不再活)夾山便打。(成始成終不打也好)師云。黃龍恁麼道。諸人切不得恁麼會。復拈云。斲鼻聖者。有運斤成風之手。亦須受斧者。有儼然不動之質。然後二俱入妙。夾山雖則有三千里外辨誦訛底眼目。若非洛浦具舉一明三底體裁。爭見針芥相投。風雲際會。雖然如是。澤廣藏山。理能伏豹。

元宵上堂。人間月半。天上月圓。幸自一天明朗。何須萬斛金蓮。諸人睡眠豁開。見得分曉。不起于座。即超于然燈之前。其或未然。燈節元來是上元。

上堂。昨夜天氣稍涼。坐久不知瞌睡。偶於瞌睡三昧中。夢得一段無上妙義。其語簡約。其理造詣。及乎天曉眼開。不謂一時忘却。且待問主丈子看。拈主丈云。主丈子。你還記得麼。主丈子云。若是無上妙義。長老何曾夢見。我自出廣長舌相。為諸人道去也。卓一下云。白日青天。且莫說夢。靠主丈下座。

無準和尚忌拈香。我與這老漢。元自不相識。於不相識中。刻骨成冤。結愈久冤愈深。至今恨深切。澆之馬渤與牛溲。爇此一爐乾屎橛。

清溪和尚訃音至。上堂。海湧山摧。劔池水竭。嘉州大像。為之含悲。峩峩普賢。泪如雨滴。牽動靈源橋下水。號湍漱石聲嗚咽。且道。因甚如此。子期去不返。伯牙良可哀。

浴佛上堂。佛真法身。猶若虛空。還有染污也無。應物現形。如水中月。還假灌沐也無。雖然恁麼。也少這一杓不得。

因雪上堂。萬木凝寒。千山積雪。少室門風。宛然如昔。惟有龍峯却較些。夜深庭際無人立。

上堂。舉澧州夾山善會禪師。初住潤州京口時。道吾至上堂。有僧問。如何是法身。答云。法身無相。如何是法眼。答云。法眼無瑕。(師着語云。答得甚諦當。切忌怕人笑)道吾不覺失笑。(不是好笑。貪他底著他底)山便下座。請道吾問。某甲適來。祇對僧話。必有不是。致令上座失笑。望不吝慈悲。(果然)吾云。和尚一等是出世。未有師在。(殺人刀。活人劔)山云。某甲甚處不是。望與說破。(實頭人難得)吾云。某甲終不說。請和尚往秀州華亭船子和尚處去。(為人須為徹。一舉兩得)山云。此人如何。(未見已前。不妨疑着)吾云。此人上無片瓦。下無寸土。(莫謗船子好)和尚若去。須易服束裝。(教人作竊禮合如是)師乃散眾。易服直造華亭。(丈夫志氣。不因楊。得意。爭見馬相如)船子纔見。便問。大德住什麼寺。(從苗辨地)山云。寺則不住。住則不似。(熟處難忘)船云不似。又似箇什麼。(雖然船裏無魚。明月也須搜過)山云。不是目前法。(瞞別人即得)船云。甚處學得來。(將來擒之。必先縱之)山云。非耳目之所到。(伎倆已盡)船云。一句合頭語。萬劫繫驢橛。(肺腑間病。一時透見了也)船又問。垂絲千尺。意在深潭。離鉤三寸。子何不道。(門上一針)山擬開口。船便以篙打落水中。(砒霜狼毒)纔上船。船又云。道道。山擬開口。船又打。(巴豆黃連)山於此有省。乃點頭。(慚愧慚愧。通身白汗。藥不瞑眩。厥疾弗廖)船云。竿頭絲線從君弄。不犯清波意自殊。(大斧斫了手摩挲。去砭劑進膏肓)山遂問。拋綸擲釣。師意如何。(妙訣丹方不容不問)船云。絲浮綠水浮。定有無之意。(草本不勞拈出)山云。語帶玄而無路。舌頭談而不談。(開得眼來天□曉)船云。釣盡江波金鱗始。遇(得箇魚兒便喜歡。費力不少)山乃掩耳。(滿面慚惶無著處)船云。如是如是。(龍頭蛇尾竹篙在什麼處)船遂囑云。汝向去。直須藏身處沒踪跡。沒踪跡處莫藏身。(鬼家活計)吾二十年在藥山。只明此事。(鈍根阿師)汝今既得。他後不得住城隍聚落。但向深山裏鑿頭邊。覓取一箇半箇。接續吾宗。毋令斷絕。(前頭驚殺人。後頭笑殺人)山乃辭行。頻頻回頭。(半是思君半恨君)船遂喚闍梨。山回首。船豎起橈云。汝將謂別有。(老婆心切。着甚來由)乃覆却船。入水而去。(却較些子。已遲八刻)師拈云。一言可以興邦。一言可以喪邦。一笑傾人城。再笑傾人國。每每以此語為過。今觀道吾船子夾山。一言一笑。一得一喪。乃知。是真語者。實語者。雖然如是。這裏莫有失笑者麼。如無。老僧自笑去也。乃

呵呵大笑云。待別人笑。堪作什麼。

上堂。召大眾云。風蕭蕭。雨蕭蕭。山雲漠漠。庭葉飄飄。普天匝地。祖意活鱗鱗。滿眼滿耳。心印何昭昭。便與麼去。衲僧門下。大故相遼。何故。行到水窮山盡處。可中別有路通霄。

住建昌軍資聖禪寺語錄

參學 編

指三門云。盡大地是箇解脫門。未嘗不與諸人同出同入。今日因甚特地。若不如是。爭知如是。

方丈。佛來不顧。祖來不顧。有三十棒。未敢分付。何故。箇中無肯路。

法座。一著高一著。一步闊一步。墮在平常。一著亞一著。一步却一步。失在巖嶮。二俱不涉。七達八通。龍袖拂開全體現。象王行處絕狐蹤。

陞座。拈香祝 聖罷。乃云。白雲深處。終朝兩眼掛枯松。黃葉落時。旱地一聲轟霹靂。禍從天降。回避無門。未免重整襤衫。再呈舊面。向松溪深處。開箇小小戲場。豎擲金圈。橫拋栗棘。俾未透者透。未吞者吞。透得過底。銀山鐵壁。粉碎無餘。吞得下底。毒藥醍醐。融成一味。坐斷千差萬別。頓超十地三賢。處處通方。頭頭得妙。致君堯舜上。再使風俗淳。鳳舞鸞翔。河清海晏。正當恁麼時如何。殊方喜見梯山貢。四野欣聞擊壤歌。

復舉保壽開堂。三聖推出一僧。保壽便打公案。師拈云。二大老。似鶻拏鳩。如鷹搦兔。收來放去。足有可觀。子細點檢將來。未免俱借這僧鼻孔出氣。若要扶豎臨濟正宗。且緩緩。

當晚小參。一水護田將綠遶。激揚少室家風。萬山排闥送青來。漏泄威音消息。恁麼會得。釋迦不出世。達磨不西來。佛法遍天下。談禪口不開。何必高推臨濟喝似雷奔。獨羨德山棒如雨點。人人脚跟下。十日炳煥。箇箇肉髻中。百寶光明。無邊剎境。靡不流輝。十世古今。舉無遺照。日月有顯晦。此則未嘗有顯晦。天地有盈虧。此則未嘗有盈虧。不離當處常湛然。覓則知君不可見。所以道。目前無法。意在目前。不是目前法。非耳目之所到。雖則非耳目之所到。爭柰意在目前。雖則意在目前。爭柰非耳目之所到。這裏一咬咬斷。一覷覷透。便見夾山眼睛鼻孔。元是自家鼻孔眼睛。其或未然。莫道西江風浪惡。錢塘更有海門潮。

復舉南泉示眾云。王老師。自小牧一頭水牯牛公案。師拈云。馬師道。惟有普願。獨超物外。因甚自牧一頭水牯牛。莫擬如何頓放。且道。過在什麼處。有人辨得。許你親見南泉。

洪首座至上堂。(能誦法華)經誦三千部。曹溪一句忘。塵塵皆寶所。處處是家鄉。雲淨天如洗。潭清月愈光。須知遠煙浪。別有好商量。

上堂。召大眾云。直下是。直下是。這邊那邊。滿眼滿耳。綿綿兮長存。湛湛兮不痕。擬議依前隔海門。

上堂。雨滴空階。溪流新漲。風起天末。葉墜疎林。喚作物却非物。喚作心不是心。缺齒老胡會不得。九年面壁空沉吟。

請後堂并義穀掌會。上堂。摩訶衍法。離四句絕百非。香飯普熏。遍十方窮三際。我此一眾。總是諸方羅籠不住底。且道。為法來耶。為飯來耶。良久云。莫鈍置。

開爐上堂。豎拂子召大眾云。這箇如大火聚。近之則燎却面門。是汝諸人如何湊泊。若也湊泊得去。盛夏不熱。嚴冬不寒。其或未然。終日雖在火爐頭。未免總是凍殺底。數。

上堂。召大眾云。佛法只在日用。日用百發百中。只如諸人。折旋俯仰。應對酬酢。飲食起居。無非日用中事。且道。佛法在什麼處。良久云。一滴水一滴凍。

上堂。十月小春。已過了三之一。愛日融和。脫似三春天氣。西舍打禾。東家蓋屋。終日忙忙地。惟有衲僧閑不徹。被閑使得沒巴鼻。有巴鼻。晝晴免得撥寒灰。夜暖偏宜伸脚睡。

上堂。名不得狀不得。取不得舍不得。不可得只麼得。趙州東壁掛葫蘆。觀音院裡有彌勒。

請耆舊修田。并謝兩序。上堂。百丈開田說大義。究竟寧免費脚手。松溪修田無可說。擊鼓陞堂但良久。知事頭首俱歡顏。見者聞者皆失笑。且道。笑箇什麼。良久云。好篇大義。一字不少。

佛涅槃上堂。諸佛不出世。亦無有涅槃。年年二月半。枉自銜悲酸。此意只今誰共委。令人拍碎玉欄干。

上堂。萬法本閑。人心自鬧。一塵不立。世界崢嶸。三賢任你三賢。十聖從他十聖。遠四天下。究竟不離這裡。何故。惟此一事實。

上堂。道在諸人。如春在萬物。雖無形色可見。而周遍於形色之間。雖無聲臭可聞。而著見於聲臭之內。是以。若草若木。含英吐華。無非陽春發越而然。諸人含齒帶髮。頂天履地。居萬物之上。為萬物之靈。莫非道力資持而然。因甚問著如何是道。十箇有五雙。面熱汗下。鉗口結舌。雖然。甕裡何曾走却鼈。

上堂。此事沒諍訛。人人不奈何。奈何不得處。合眼跳黃河。跳得後如何。元來佛法苦無多。

結夏上堂。今朝結制。制如何結。內不放出。外不放入。壁立千仞。千仞壁立。這箇猶是諸方普請邊事。且道。松溪如何。喫茶珍重歇。

謝秉拂上堂。宗通說通。抹過西東。無兩舌頭。有雙箭鋒。因甚如此。閩蜀同風。

上堂。計較不得處。不知計較不得底。畢竟是誰。馳求不息時。自是馳求者。當頭蹉過。不蹉過是什麼。門外青山。一朵兩朵。三朵五朵千萬朵。

瑞州黃蘗山報恩光孝禪寺語錄

參學 編

指山門云。千人排門。不如一人拔關。且道。誰是拔關者。喝一喝。

佛殿。德山推倒。雲門打殺。黃蘗燒香。殷人以柏。

方丈。這裡如大火聚。近之則燎却面門。直饒佛祖到來。未免退身有分。何故。無你棲泊處。

法座。此座高廣。誑嚇阿誰。吾不能升。賣弄不少。舍利弗恁麼。新黃蘗不恁麼。何故。因行掉臂。

陞座。拈香祝 聖罷。乃云。放下松溪竿頭絲線。整頓祇園舊日家風。九枝榷鬱鬱蒼蒼。一溪水清清淺淺。猿啼疊嶂。鳥語疎林。佛法大意。覷面當機。黃蘗宗旨。當機覷面。這裡有人荷紹得去。今日開堂。功不浪施。其或未然。卓拄杖一下云。只將這箇真消息。仰祝吾皇億萬年。

復舉同光帝問興化和尚云。朕收中原。獲得一寶公案。師拈云。同光帝兩手捧來。莫非至寶。老興化一言合轍。歡動龍顏。雖然。借看則易。酬價則難。留將千古與人看。

當晚小參。六十山藤。婆心太切。三拳肋下。癡漢呈乖。了知佛法本無多。開得眼來天大曉。直饒栽種得。不是棟梁材。黃蘗乍到此間。人事恹恹。若有此等奇特後生。來問佛法大意。雖有拄杖。未暇分付。待伊走到。大愚灘頭。甦省歸來。且緩緩地。卸下衲衣。痛與一頓。免得上頭上面。遞相鈍置。雖然。若無舉鼎拔山力。千里烏騮不易騎。

復舉當山祖師示眾云。汝等諸人。盡是嚙酒糟漢公案。師云。諸人要見祖師麼。眼高四海空無人。氣吞餘子不足數。

上堂。春雪乍晴。春光愈好。不必遠討幽探。不用談空說有。何故。村村自花柳。

上堂。拈拄杖召大眾云。登山須到頂。入海須到底。登山不到頂。不知山之高。入海不到底。不知海之深。海深所以容魚龍。山高所以容虎豹。提起拄杖云。只如拄杖子。身材既小。高又不高。深又不深。且道。容得箇什麼。卓一下云。此中空洞渾無物。何止容君數百人。靠拄杖下座。

上堂。心不是佛。智不是道。拋却深村。又入荒草。只如以一重去一重。不知轉交涉轉料掉。畢竟如何。心不是佛。智不是道。

上堂。召大眾云。九十春光。已過了三之二。是處園林減紅添翠。鶯遷喬木。燕壘新巢。也自忙忙地。衲僧門下。又且如何。鑪香靜坐。一物不為。日日一般。朝朝如是。拍禪床云。未能如是。安能如是。

上堂。一明一切明。一了一切了。道無不是無。道有元非有。毗婆尸佛早留心。直至如今不得妙。

無準和尚忌拈香。含笑吟吟。懷毒深深。左搓芒繩。生縛鬼子。倒拈蝎尾。殃害平人。我雖蹉脚跨他門。幸不遭他毒氣熏。如何見得。插香云。只此為憑。

上堂。古者道。開方便門。示真實相。以拄杖劃一劃云。方便門開也。真實相在什麼處。卓一下云。數片白雲籠古寺。一條綠水遶青山。

四月八上堂。摩耶昔產一塊鐵。無可名之名悉達。擬鑄金軀鑄不成。無端鑄成一大錯。錯錯。至今累我東土人。年年轉洗轉埃塵。

上堂。召大眾云。祖師道。汝學佛法。如下種子。我說法要。譬彼天澤。以是知種子所當有。天澤不可無。然而雨多則苗稼有傷。言多則却道轉遠。且如何得相應去。揠苗助長非吾事。塊雨條風不汝欺。

上堂。舉教中道。此事惟我能知。又云。惟佛與佛。乃能知之。又道。如人飲水。冷暖自知。如是則諸佛出世祖師西來。未免勞而無功。雖然。不因柳毅傳書信。爭見龍王宮殿深。

解制上堂。一結一切結。一解一切解。結解兩忘。通身瀟灑。絕瀟灑。脫羅籠。巨魚縱大壑。一雁入高空。

謝秉拂上堂。意句俱到。不入深村入荒草。意句不到。珊瑚樹林日杲杲。只如一言道盡。意況不及時如何。良久云。到江吳地盡。隔岸越山多。

宣首座至。上堂。捧鉢盂於南泉位上。陷虎機深。致臨濟於黃蘗面前。為人心切。如是眼目。如是作用。古今無間。前後無差。孤鷺高飛趁落霞。

上堂。召大眾云。三玄三要。五位君臣。說偏說正。分主分賓。未免重添眼裡塵。拈拄杖劃一劃云。盡情劃斷。空濶無垠。孤鴻杳杳知何處。門外蕭蕭落葉頻。

中秋道舊至。上堂。雅愛中秋月。多情似故人。在天何皎皎。照我更頻頻。圓影隨流水。清光絕點塵。孤高攀不及。覲面最相親。

上堂。九秋強半。不寒不暖。風細細雨霏霏。水冷冷雲淡淡。正當恁麼時。還有西來祖意也無。良久云。一棹烟波。蘆花兩岸。

佛成道上堂。六年雪嶺幾番雪。不是今番徹骨寒。半夜三更禁不得。無端北斗面南看。瞿曇瞿曇。開得眼來天大曉。不知紅日已三竿。

上堂。拈起拂子。召大眾云。這一捏子。從上諸佛諸祖。以至天下老和尚。盡不奈何。諸人還奈何得麼。莫道諸人山僧也不奈何。既不奈何。畢竟如何。良久云。雪消知地暖。雲靜見天高。

住袁州仰山太平興國禪寺語錄

參學 編

師於咸淳元年五月十七日入院。踞方丈云。昔老維摩。起模畫樣。分明兩箇五尺。剛然道有一丈。諸人如不信。後五日無事。試來量看。

省筭。祖師道。如人在千尺井中。不假寸繩。如何出得。自做艱難作什麼。今日太傅平章罔公。以幹旋造化之手。向九仞重泉之下。等閑拈出。一箇轟轟苴苴。不唧[口*留]漢。絲毫不犯。致之雲端。盡大地人。只眨得眼。且道。據箇什麼。良久云。筭。

諸山江湖疏。琢雪雕冰。攢花簇錦。鄰義昭昭。友義炯炯。扶人上樹。推人下井。劫石可消。此恨難殞。

法座。高不過尋尺。廣不過尋尺。舍利弗道。吾不能升。何乃甘自屈抑。看看。仰山今日平步去也。

陞座。拈香祝 聖罷。(問答不錄)乃云。據令四藤棒頭。有眼明如日。特書卍字。碧眼胡僧笑揭天。雖則雷厲風飛。已是烏焉成馬。所以道。言語動用沒交涉。非言語動用。亦沒交涉。纔擬恁麼。便不恁麼。斬新拈掇。覷面提持。袁州城裡。春臺壁立平如砥。集雲峯下。古廟香爐口向天。薰風南來。涼生殿閣。這裡領略得去。不孤山僧。五百餘里。冒暑而來。堪報不報之恩。共助無為之化。其或未然。千峯朝華嶽。萬派肅滄溟。

復舉乳源和尚示眾云。西來的的意。不易舉唱。時有僧出。源便打云。是什麼時節。汝出頭來。便歸方丈。

師拈云。布袋裡盛錐子。不出頭是好手。乳源怪者僧不知時節。即且置。乳源還知麼。乳源不知即且置。新仰山還知麼。達磨當年無板齒。只因強自出頭來。

當晚小參。德山小參不答話。高高峯頂立。趙州小參却答話。深深海底行。二大老。雖則力敵勢均。未免徐六擔板。一人於龍潭手內。接得少許紙燭。將作一條白棒。佛來也打。祖來也打。向常武界上。風高放火。月黑殺人。一人於南泉臥次。度得幾句謔語。裂轉舌頭。曾到也道喫茶去。不曾到也道喫茶去。向幽燕那畔。賣狗懸羊。指鹿為馬。使二老當初知有。衲僧門下。佛祖柰何不得底一著子。必不作此去就殃害平人。本欲盡情鞠勘。貶向他方。適以入院之初。人事倥傯。且與放過。雖然。且道。仰山今夜小參。畢竟是答話不答話。良久云。一朝權在手。看取令行時。

復舉當山祖師。一日有異僧乘空而至。祖云。近離何處。僧云。西天。祖云。幾時離彼。僧云。今早。祖云。何太遲生。僧云。遊山玩水。祖云。神通妙用則不無尊者。佛法須還老僧。僧云。我來東土禮文殊。却見小釋迦。由是出貝多葉示之。騰空而去。師拈云。明鏡當臺。胡來胡現。漢來漢現。則故是。因甚這僧當面塗糊。集雲

自有正令。却與放過。意在於何。良久云。千鈞之弩。不為鼯鼠而發機。

中夏上堂。六月中夏。諸方放假。大仰不然。繩頭緊把。常住百無一有。不能掛懷。只憂兄弟不會狗子無佛性話。雖然。常啼菩薩賣心肝。風前狼籍誰人買。

上堂。赤肉團上。有一無位真人。眼裡耳裏。鼻裡口裡。頻頻出入。出入頻頻。能言能喚。能屈能伸。能好能惡。能喜能嗔。諸人若也未曾證據。便請證據。集雲今日為汝保任。其或未然。無位真人。是什麼乾屎橛。

無禪和尚至。上堂。寶劍出匣。精金躍冶。色澤星輝。光鋸斗射。投之重津。而光愈發越。加之烈火。而色無少假。行為人間報不平。定應索起遼天價。

上堂。雁入高空。蛩吟古砌。劇談不二門。單明第一義。瞎却眼塞却耳。聽得分明見得親。不必龍華親授記。

中秋上堂。召大眾云。從上佛祖。善巧方便。千說萬說。只說得光影邊事。後代兒孫。貪觀天上。蹉過目前。或掉棒打。或水中捉。轉沒交涉。且道。如何得相應去。以拂子打圓相云。此夜一輪滿。清光何處無。

重九上堂。談玄談妙。將油洗皂。行棒行喝。剝肉成瘡。諸方多是誇張作說。集雲只據見定商量。何故。年年九日是重陽。

上堂。風動心搖樹。雲生性起塵。只如雲未生風未動已前。心性在什麼處。諸人還知麼。若也知得。旋嵐偃嶽而常靜。江河競注而不流。野馬飄鼓而不動。日月歷天而不周。其或未然。不覺日又夜。爭教人少年。

上堂。今朝臘月二十五。明朝臘月二十六。風前唱起仰山歌。人皆道是雲門曲。是則也是。只是音韻有些不同。如何見得。良久云。絲與竹。不同肉。

歲旦上堂。元正啟祚。萬物咸新。覓一毫舊相。了不可得。千年桃核裡。元是舊時仁。覓一毫新相。了不可得。新舊之相。既不可得。不可得亦不可得。道泰時清萬國寧。咸淳二年正月一。

眾僧入城。赴瀉山齋歸。上堂。召大眾云。飛雪亭前。宜春臺上。物有萬殊。春無兩樣。住不顧去底。猶欠劈面拳。去不顧住底。好與攔腮掌。直饒去住兩忘。如龍似象。未免卸下衲衣。連揮痛棒。棒折也不放。且道。是罰是賞。不見道。為人須為徹。殺人須見血。

上堂。仰山上元令節。笙歌且靠一壁。雪晴山色授藍。凍解溪流瀨石。滿眼看不盡。滿耳聽不徹。諸人若向這裡知歸。不須更授然燈記別。

上堂。召大眾云。有祖以來。談玄說妙。斬新拈掇。格外提持。總是外邊打之遶。徑截一句。作麼生道。良久云。春風料峭。凍殺年少。

佛涅槃上堂。(是夜雷雨)佛滅二千有餘載。五逆兒孫渾不採。一夜雷轟雨霽霽。諸天亦為之耐耐。汝等諸人。且莫錯怪。元是這老漢。在娑羅雙樹下。震法雷擊法鼓。布慈雲兮洒甘露。演說一路涅槃門。涅槃門一路。集雲與麼告報。是真實邪。虛妄耶

。不見道。謂吾滅度。非吾弟子。謂吾不滅度。亦非吾弟子。

上堂。拈拄杖。召大眾云。你有拄杖子。我與你拄杖子。你無拄杖子。我奪你拄杖子。芭蕉老人。雖則一期與奪可觀。未免扶強不扶弱。集雲則不然。有亦不與。無亦不奪。自家拄杖。自家提掇。遂卓一下云。應用臨機活鱗鱗。靠拄杖下座。

上堂。諸人分上。各有一所清涼寶殿。六門虛豁。八窓玲瓏。薰風拂拂來無時。畏日炎炎曾不到。泉流屋上四時雨。鶴立松梢萬境閑。汝等諸人。還知也無。若也知得。各自歸家穩坐。其或未然。三條椽下。七尺單前。試將瓦子敲門看。

解制上堂。結却布袋頭。三世諸佛。無出氣處。放開斗門闌。百萬魚龍。有路轉身。振鬣擺尾。搖乾蕩坤。轟雷掣電鼓風雲。雖然。也須是照顧始得。且道。照顧箇什麼。照顧向齋甕裡淹殺。

謝兩序上堂。召大眾云。天無私覆。以三光。地無私載。以五嶽。定國安邦。以文武百辟。匡徒領眾。以東西兩班。一或有虧。萬有不就。拈拄杖云。只如拄杖子。平日撐天拄地。支險扶危。還假他力也無。卓一下。靠杖伸手云。拈起放下。也少這箇不得。

上堂。八月秋何處熱。稻花吹香。踈林減葉。三點五點不時雨。一聲兩聲何處笛。若向這裡。聞無有聞。證入圓通。斯為第一。

中秋上堂。吾心似秋月。秋月似吾心。雙照纖塵淨。俱清萬籟沉。十分明又白。一樣古猶今。不是寒山子。何人解此吟。

上堂。九月授衣。無衣可受。衲僧門下。別有要妙。如何見得。不見道。新糊紙被烘來煖。一覺和衣到五更。聞得上方鐘鼓動。又添一日在浮生。

上堂。召大眾云。百尺竿頭。進得一步。上無攀仰。下絕己躬。萬煅爐中。煉得十成。撲之不破。擊之不碎。雖然。更須知有向上三昧。何故。萍蕪盡處是青山。行人更在青山外。

重九上堂。秋雨乍晴。秋天如洗。九日菊花新。千林黃葉墜。人人只知驟步登高。往往蹉過自家穩密田地。莫有不蹉過底麼。良久云。切忌切忌。

上堂。召大眾云。萬法本無。一心何有。絕慮忘緣。默默自守。儻能朝於斯夕於斯。自然虛而靈。空而妙。正當恁麼時。遂伸手云。我手何似佛手。

上堂。集雲不會禪。不會道。橫畫不識。豎畫不曉。日裡三餐。夜後一覺。年來老且病。轉見不唧[口*留]。裙子褊衫箇也無。袈裟形相些些有。遂提起袈裟云。見麼。要底將取去。其或未然。莫怪老僧好。

謝四頭首秉拂。上堂。召大眾云。四葉紅蓮。一音宣演。其語巧妙。其義深遠。前印威音。一點不差。後證彌勒。不差一點。離四句。絕百非。即不無。只如一人恁麼。一人不恁麼。一人恁麼中不恁麼。一人不恁麼中却恁麼。又且如何。良久云。造作不同。一般米麪。

蟠龍鑑首座至。上堂。衲僧家無本據。鑑在機先。妙在轉處。問遍堂上。半座平分。集雲峯前。孤風絕侶。看看九萬搏扶搖。垂天之翅摩雲霄。

入城歸上堂。初二出城。歸來初五。十字街頭撞見張三。元是山前舊時李四。面目如前。語言如故。再三道。佛法澆漓。眾生難度。不必按牛頭喫草。不用將針合成斧。何故。甜瓜徹蒂甜。苦瓠連根苦。

上堂。二月初五。群花競吐。或逞天紅。或誇雅素。月下精神。風前態度。明明祖意無回互。堪悲堪咲老靈雲。錯認桃花作眼睛。至今猶自不惺惺。

上堂。召大眾云。薰風南來。涼生殿閣。諸佛出身處。昭昭在心目。當機覲面。回避無門。只要諸人披襟領略。其或未然。開眼也著。合眼也著。

上堂。一月復一月。此月又過五。兩輪日月何奔忙。百年彈指如虛度。物不遷。還知否。不是佛亦非祖。且道。畢竟是箇什麼。良久云。流水不腐。戶樞不蠹。

謝兩班并秉拂上堂。入理深談。語非語。默非默。量材補職。武是武。文是文。用舍臨時。剴裁在我。只如將丈六金身。作一莖草用。將一莖草。作文六金身用。又作麼生。良久云。囊中天子勅。塞外將軍令。

中秋上堂。我心似秋月。道似又還別。秋月有虧盈。吾心無損益。人人只知登樓賞翫。向天邊覓。殊不知。自己衣單下。有箇光明藏子。十分圓滿。十分皎潔。信得及見得徹。非惟一夕歡。千古可怡悅。

上堂。不思善。不思惡。孤迥迥。活鱗鱗。不用追尋。不勞捉摸。只貴諸人知著落。知著落。楊岐驢子三隻脚。

上堂。召大眾云。楊岐栗棘蓬。吞著礙喉嚨。東山鐵餒餒。渾崙苦礪礪。諸人若要省力。不如參一箇平實。且道。是那箇平實。不見道。楚王渡江得萍實。大如斗赤如日。剖而食之甜如蜜。

上堂。若論此事。諸人分上。本自具足。初無欠少。三世諸佛。競出頭來。不過指似得你。歷代祖師。天下老和尚。互相提唱。不過說向得你。集雲。今日鼓兩片皮。不過勸勉得你。何故。不見道。舜何人也。予何人也。有為者亦若是。

住福州雪峯崇聖禪寺語錄

參學 編

師於咸淳五年三月二十一日入院。據室。南山一條鼈鼻蛇。多少人向這裏弄死了也。拈拄杖云。今日拈來。活弄將去。擲杖云。汝等諸人。各須照顧。

陞座祝 聖罷。乃云。法無定相。時止則止。時行則行。遇緣即宗。在秦為秦。在楚為楚。放下仰山鍬子。輓起雪峯木毬。雷動七閩。風行百越。俾未見者見未聞者聞。聞見歷然。是箇什麼。這裏領略得去。開山祖師。在你脚底。鰲山未到。成道多時。象骨未登。說法久矣。然雖如是。今日開堂。又作麼生。豎拂子云。只將這箇真

消息。仰祝吾皇壽萬年。

復舉開山祖師問僧。甚處來。僧云。江西。祖師云。江西與此間。相去多少。僧云。不遙。祖師豎起拂子云。還隔這箇麼。僧云。若隔這箇即遙也。祖師便打。

師拈云。問處分明。答處端的。且道。江西與此間。畢竟相去多少。若少若也知得。便新雪峯。去楚來閩。不移寸步。其或未然。豎拂子云。何止隔這箇。

當晚小參。盡大地是自己。水是水。山是山。會四海為一家。胡自胡。漢自漢。於其中間。覓一毫爾我之相。了不可得。覓一毫內外之相。亦不可得。既無爾我。又無內外。通上徹下。是箇大解脫門。如千鏡圍繞。無你回互處。如十日並照。無你遮掩處。只要箇上無攀仰。下絕己躬。寸絲不挂底。荷負得去。便見千五百人善知識。面目見在。其或未然。任從滄海變。終不為君通。

復舉開山祖師。一日參次。有僧出。珍重便去。祖師云。總似這箇師僧。省我多少氣力。玄沙云。和尚恁麼接人。瞎却閩中一城人眼去在。祖師云。汝又作麼生。玄沙云。好與三十棒。祖師云。已後無人奈汝何。師拈云。古今盡道。玄沙有超師之作。殊不知。被祖師好好掘箇坑子。深深埋了。直至而今出不得。具眼者辨取。

上堂。人人頭頂天腳踏地。眼裏放光。鼻孔出氣。與他諸佛諸祖。無別無異。因甚握節當胸。聽我謾你。莫有不被謾麼。我且問你。雞寒上樹。鴨寒下水。畢竟是祖意。是教意。

真覺祖師忌日上堂。昔日不生。今日不滅。出入飛鷲嶺。未曾有出入。洞山不曾到。投子不相識。若道嗣德山。未免自屈抑。且道。今日設忌。還來應供也無。良久云。象骨巍巍摩碧空。寒泉皎皎浸明月。

中秋上堂。節屆中秋。涼颼四起。萬里無雲。一天如洗。明皎皎月上孤峯。香拂拂桂飄庭際。以拂子擊床云。會麼。以我為隱乎。吾無隱乎爾。

無準和尚忌日拈香。三十年前。無交涉處有交涉。三十年後。有交涉處無交涉。須無交涉。飲恨難忘。含悲含笑一爐香。

結夏上堂。二千年前。冬寒夏熱。二千年後。夏熱冬寒。雪峯今日安居。不過只要諸人順時保愛而已。若是踞菩薩乘。修寂滅行。他家自有座主在。諸人切不得錯恠老僧。何故。卓丈云。主丈生根休用剪。鉢盂無柄不勞安。

城歸兼謝辨藏主上堂。綠水青山。紅塵鬧市。一大藏教。滿眼滿耳。這裏有人揀辨得出。入則箇箇歸元。出則無無不是。雖然。只如馬祖震威一喝。百丈三日耳聾。又作麼生。良久云。破草鞋見水。

正旦上堂。辛未元正有則語。大地無人知落處。屋角山禽破曉啼。為人一一從頭舉。且道。說箇什麼。歲旦無風。甲子不雨。

中秋城歸上堂。自夏及秋。頻頻出入。送舊迎新。奔馳不歇。十字街頭忽喫擲。起來拾得胡餅隻。今日不辭舉似諸人。以拂子打圓相云。見麼。團團圓圓。皎皎潔潔

。十成脫似中秋月。

上堂。一年十二月。是臘月年尾。臘月三十日。過了三之二。雪峯晝裏夜裏。波波挈挈。手不釋杓。脚不離地。理會甚底。忽然被人道。千五百人善知識。因甚也脚忙手亂。又且如何支遣。良久云。老僧住持事繁。

上堂。一葉落天下秋。殊不知。象骨峯頂。一葉未落已前。秋已到多時了也。如何見得。良久云。六月山房冷似冰。

上堂。祖師道。望州亭。與你相見了也。烏石嶺。與你相見了也。僧堂前。與你相見了也。祖師與麼與人相見。猶隔海在。何故。盡大地撮來。如粟米粒大。望州亭。烏石嶺。僧堂前。甚處得來。老僧未出瞿塘關。已與諸人相見了也。莫有信得及底麼。良久云。萬古長空。一朝風月。

上堂。衲僧行處。孤風凜然。動無妄動。言無妄言。如履薄冰。如臨深淵。不須明祖意。只此是單傳。

上堂。大作業人。安禪入定。大修行人。披枷帶鎖。恁麼會得。清淨行者。不入涅槃。破戒比丘。不入地獄。好與一狀領過。雖然如是。莫將閑學解。埋沒祖師心。

上堂。節屆中秋。風清月朗。盡大地人。爭先賞翫。賞翫即不無。我且問你。月來眼裏。眼往月邊。有人道得。許你廣寒宮裏。高折桂枝。其或未然。莫辭終夕看。動是隔年期。

退院上堂。召大眾云。馬師一喝。大雄峯直得三日雙耳聾。今日松山聾更甚。半年不復聞鼓鍾。依稀鈍鐵。彷彿頑銅。只好投之火聚中。火餘爛爛地通紅。幾多錯認。烏啼月落。煜煜曉星明向東。

住慶元府太白名山天童景德禪寺語錄

參學 編

師於咸淳九年三月十一日入院。指三門。天門一合。十方無路。似海之深。如山之固。且道。如何造入。良久云。步。

佛殿。舉香云。謂這箇不是佛。謗沉無香。謂這箇是佛。增金以黃。二俱拈却。一倒一起。築著磕著。

方丈。這裏是普請盡大地人。成佛底去處。牙如劍樹。口似血盆。未敢相許。只如嫌佛不做底。到來時如何。良久云。三十棒且待別時。

勅黃。天人群生類。舉起云。皆承此恩力。且如何是此恩力。囊中 天子勅。

府疏。一畫未形三墳已。且恁麼見得。光焰何啻萬丈長。其或未然。言外領取。

山門。諸山江湖疏。函蓋乾坤句。隨波逐浪句。截斷眾流句。三句盡在此。不多一字。不少一字。眾眼難瞞。分明舉似。

法座。向上一路。只在脚底。切恐諸人尚未知。且行一轉似與你。遂驟步登座。

拈香。此一瓣香。芽孽於混沌未分之際。歷世滋多。馥郁於乾坤既定之餘。騰芳愈久。爇向爐中。恭為。

今上皇帝。祝延聖躬萬歲萬歲萬萬歲。陛下恭願。一人有慶。致四海於昇平。萬壽無疆。同兩儀而永久。次拈香。一瓣。奉為太傅平章魏國公大丞相樞使國公簽書相公。伏願。作股肱耳目。與天齊休。為舟楫棟梁。同心共濟。次拈香云。此一瓣香。九回拈出。四海共知。奉為前住徑山先師佛鑑圓照無準禪師大和尚。非圖報德酬恩。且要熏天炙地。遂跌座。(問答不錄)乃云。飛鸞渡口。細柳含烟。宿鷺池邊。長松蔽日。大光明藏。不離當處。覺城東際。只在目前。溪山各異。雖則二十里之遙。雲月是同。灼然無一毫之隔。所以道。心同虛空界。示等虛空法。證得虛空時。無是無非法。既無是法。又無非法。且聽。主丈子。逞神通去也。拈主丈。卓一下云。[翟*欠]瞎正法眼。畫一畫云。畫斷破砂盆。俾今日一會聞者見者。脫離聞見獲大總持。透過威音那邊。復見古道顏色。民康物阜。海晏河清。萬姓樂堯仁。八方歌舜化。正恁麼時如何。靠主丈。蒲團靜倚無餘事。永日寥寥謝太平。

復舉僧問投子和尚。如何是一大事因緣。投子云。尹司空與老僧開堂。師拈云。投子古佛。如大富長者踞庫藏中。信手拈來。無非明珠大貝。惜乎撞著這僧。寧免暗投。今日或有人問如何是一大事因緣。只向他道。老僧四十年前。曾到此間來。

當晚小參。昔年曾到。危樓傑閣攂然。今日重來。啼鳥野花猶識。山中故人知我至。爭來問訊今何似。獨有隰州老人。蹙頰而言曰。法道下衰。無甚今日。佛佛要機。無人採著。祖祖機要。誰解論量。所謂水清徹底。魚行遲遲。空闊莫涯。鳥飛杳杳底消息。蔑聞也。既荷遠來。毋忘悲願。重新拈掇。啟迪後來。此外無禱。因謂之曰。茲承告誡。敢不遵從。第新來乍到。未知廚竈。廚竈尚未知。況廚竈外事。雖然。這裏莫有佛佛要機。祖祖機要。盡情颺下。渾不採著底麼。却許他是箇衲僧出來。掀倒禪床。呵叱古佛。未為分外。其或未然。休將傳說為傳說。莫把曾參作魯參。

復舉寶公令人傳語思大。何不下山教化眾生。一向目視雲霄作麼。思大云。三世諸佛。被我一口吞盡。何處更有眾生可度。師拈云。鍾山南嶽。以手指口云。總被這箇礙。一人開了合不得。一人吞了吐不得。直至如今。柰何不得。天童還柰何得麼。良久云。早知今日事。悔不慎當初。

留兩序併謝諸山。上堂。舊時日月。舊日山川。東西不易。南北不遷。水雲雜沓。龍象駢闐。古佛家風尚儼然。如何見得。良久云。雨過千林開翠幄。月臨雙沼浸銀蟾。

無準和尚忌日拈香。舉香云。咄。這老漢。不堪共語。寬而不廓。纖粟詎能容。質而不文。麤拳為正句。我昔錯擔脚踏門。至今有恨無雪處。有雪處。麤茗一杯。臭煙一炷。

結制上堂。拈拄杖。召大眾云。法性土中。幸自太平無事。二千年前。剛被黃面老漢忘起兵端。直至如今。年年團結。防拓未已。天童雖則老不以筋力為能。未免拈起無柄鐵苕帚。掃蕩煙塵。俾復見劫初無事之日。卓丈一下云。且喜太平。

訪諸山歸上堂。召大眾云。走盡四天下。只在一塵中。不離一塵中。周遍四天下。不是神通。亦非力假。有人知得著落。許你入妙喜世界。是不動如來。其或未然。一任鑽龜打瓦。

上堂。召大眾云。休去歇去。玲瓏巖上落花雨。消焉息焉。路入清關別有天。塵不到。暑不到。行亦禪。坐亦禪。高蹈威音未朕前。正恁麼時如何。喫粥喫飯過。聽風聽雨眠。

上堂。諸莊荒旱。吾總不憂。只憂兄弟不會狗子無佛性話。東山演祖恁麼道。若以事上看。老婆心切即不無。若以理上看。屈抑諸人也不少。何故。舜何人也。予何人也。有為者亦若是。

回祿後上堂。鼓報四更。地搖六震。火焰為三世諸佛說法。三世諸佛立地聽。聽則不無。且道。說箇什麼。虛空有盡。大道無窮。窮則變。變則通。卓丈一下云。信手拈將莖草插。瓊樓玉殿凌蒼穹。

元宵上堂。兼謝新都寺。召大眾云。排難解紛。還他敏手。回生起死。須是其人。既得其人。可以定禍亂。可以致太平。復三代禮樂於今朝。開萬解金蓮於此日。元宵共慶。良夜同歡。雖然。猶是尋常遊戲邊事。極則一句。又作麼生。疾風知勁草。版蕩識誠臣。

上堂。召大眾云。仲春漸暖。是處花開。夭桃烘日暈生臉。紅杏吟風笑滿腮。是今彌勒。是古如來。一一分身不用猜。有人一見便見。敢保老兄未徹。何故。即色即聲求不可。離聲離色覓猶乖。

蘇湖行化歸上堂。去時元只空双手。歸日依前双手空。底事兩肩擔不起。打開畚塞滿玲瓏。且道。是箇什麼。良久云。姑蘇明月。苕霅清風。

上堂。召大眾云。泯志灰心。參禪學道。無煩惱中。自討煩惱。何不向老胡未來已前。試著眼看。自己分上。有何欠少。天童恁麼道。不入深村入荒草。畢竟何如。不許夜行。投明須到。

佛涅槃上堂。謂吾滅度。未免落斷見。謂吾不滅度。未免落常見。二見俱遣除。十方佛皆現。且道。釋迦老子。是滅度耶。不滅度耶。莫有辨明得底麼。良久云。桃花著雨洗紅粧。揚柳舞風拖綠線。

前瑞巖希叟和尚至。上堂。斗粟可舂。尺布可縫。情深義重。山包海容。載笑載言。喜而欲舞。何故。豈無他人不如我同父。

上堂。菩提離言說。從來無得人。所以世尊道。我於燃燈佛所。若有一法可得。則燃燈佛。不與我授記。既是無一法可得。用授記作什麼。若不授記。爭知無一法可

得。恁麼看來。以言說求菩提。固不可。離言說求菩提。亦不可。畢竟如何。渡河須用筏。到岸不須船。

復云。夏令更新。春歸奏勳。秧田鋪翠。麥隴翻雲。日猶舒暖。風已來熏。目擊道存如不委。更饒一喝主賓分。乃喝一喝云。且道。是主是賓。

謝化士歸上堂。召大眾云。見可而進。知難而退。未出常流。戰無不勝。攻無不取。方為好手。烟塵眯目。白刃滿前。赤手空拳。奮身不顧。所過者化。所存者神。所嬰者摧。所敵者破。休征罷戰。奏凱獻俘一句。作麼生道。壓殺兩肩擔不起。滿船和月載將歸。

上堂。秋風清。秋月白。秋水共長天一色。不是心外境。亦非目前法。可中一見便知歸。平步廣寒攀桂枝。

上堂。海山雨歇。水國雲藏。薰風南來。殿閣生涼。佛出身處。昭然孔彰。堪笑當年奚老子。無端好肉上剜瘡。

宏智祖師忌拈香。偏中正。正中偏。正偏不及處。別是一壺天。水澄澄。風細細。雲澹澹。月娟娟。金針兮纖纖。玉線兮綿綿。以此續洞脉於既微。以此大丹霞之正傳。作興太白。特遊戲之餘焉。今不在後。昔不在前。光明藏中。初無間然。一盃麤茗一爐煙。

天寧覺庵和尚至上堂。拈主丈。召大眾云。故人義重。訪我巖扉。鳥啼花笑。雲淡風微。莫恠坐來。卓主丈三下。頻勸酒。自從別後見君稀。

上堂。十五日已前。棒如雨點。十五日已後。喝似雷奔。正當十五日。棒也不拈。喝也架閣。諸人向甚處見天童。歷歷分相珠在盤。剔起眉毛還蹉過。

一切希叟和尚兩訃音至。上堂。召大眾云。去秋双峩摧。今夏芝巖墜。松江松慘然。花嶼花流涕。惟有長空孤月圓。東西分照兩無偏。

元宵上堂。召大眾云。天童今日著堅固鎧。奮不顧身。卓丈云。將德山棒。掃除四境魔軍。貴圖安靖。以臨濟喝。叱退三邊強寇。遄至清平。然後。打禾山鼓。奏凱回戈。歸馬於華山之陽。放牛於桃林之野。作金牛舞。唱太平歌。風以時。雨以時。五穀熟。民人育。且道。是神通妙用。法爾如然。良久云。我見燈明佛。本光瑞如此。

淨慈東叟和尚遺書至。上堂。拈辭世頌。南山末後句。未舉先分付。生也何曾生。死也何曾死。生本不有。死亦無空。湖光晴潑灑。山色雨濛瀟。

中秋上堂。并謝離相西堂。一月在天。影含眾水。且道。有相可離。無相可離。若道有相可離。月以何為相。若道無相可離。爭柰一月在天。影含眾水。諸人還知麼。萬古碧潭空界月。再三撈摭始應知。

小參

九旬禁足。截鶴續鳧。三月安居。穿牛絡馬。二千年前。黃面瞿曇。於一針鋒上。分疆立界。俾一切人。依如是住。從古暨今。未嘗有踰越者。東山自小入眾。不曾受人抑勒。而今四十八歲。匡徒領眾。只據見定。三春持鉢。九夏出鄉。朝往羅浮。暮歸檀特。鬧市紅塵。拋沙撒土。深山窮谷。嘯月眠雲。樓閣重新彈指間。風光占斷無邊際。然雖如是。還有佛法道理也無。咄。清平世界。切忌訛言。

結制。口吸西江。不與萬法為侶。且居門外。耳聞一喝。直得三日聾。未許參堂。寶峰不是鑿空架虛。深溝高壘。蓋緣這裏無你棲泊處。無你摸索處。一潭湛如海。龍不許蟠。重關險似天。鳥飛不度。須是具威音王已前眼目。達磨未來時機用。方許陞寶峯堂。入寶峯室。見寶峯主。其或未然。九十日中。一任東卜西卜。

結制。衝開碧落松千尺。仰彌高鑽彌堅。截斷紅塵水一溪。澄不清。攪不濁。這裏挨得入。進得步。便可達顯源源。截顯源流。竭顯源水。大顯源派。攬長河為酥酪。變大地作黃金。撥亂乾坤。掀翻海嶽。有何制可結。有何生可護。出則無無不是。入則个个歸源。靜作不痕。卷舒絕朕。然雖如是。更須知有松溪向上一路始得。且道。路頭在什麼處。良久云。苔生也。

除夜。臘月盡是歲除夜。明朝又是正月一。年去年來無盡期。拈拄杖云。拄杖依前烏律律。拄杖子。我且問你。老僧與你相見。看看六十有餘年。今年也只恁麼烏律律地。明年也只恁麼烏律律地。殊無長進。何耶。因甚得名為拄杖耶。卓一下云。我自塵劫以來。身如枯柴。不與時遷。不與歲改。惟守寂默。不妄開言。今夜既蒙發問。不敢不告。卓一下云。我姓拄。名杖子。天地以我為主。無我則不能覆載。日月以我為主。無我則不能運行。四時以我為主。無我則不能代謝。萬物以我為主。無我則不能生成。貴為天子。以我為主。無我則不能掌握乾坤。賤為庶人。以我為主。無我則不能成家立業。三世諸佛。六代祖師。天下老和尚。諸方善知識。以我為主。無我則不能說法度人。五湖四海禪和子。見前大眾。以我為主。無我則不能尋師訪道。以至三千大千世界。百億四天下。若草若木。若飛若走。羽毛鱗甲。含蠢蠕動。以我為主。無我則不能得活。若有一物不以我為主。而得活者。無有是處。以是得名為拄杖子。拄杖子。我看你身量。不過七尺。大不盈一握。許多神通妙用。從甚處得來。卓一下云。我此神通妙用。不從人得。當體具足。用之則有。不用還無。若信得及。便見我分上。有許多神通妙用。若信不及。未免只道我終身烏律律地。殊無長進。既然如是。我此寺門。種種缺乏。百無一有。今夜除夕。無可分歲。何不為我一眾略施設耶。卓一下云。太無厭生。

歲夜。世尊有密語。嶺上梅花漏泄多時。迦葉不覆藏。庭前爆竹熾然而說。恁麼會得。是法住法位。世間相常住。歲鑰迭更而不易。璇璣妙轉而不移。雲峯峯頂。南山雲起北山雲。雪谷谷中。岩上雪飛岩下雪。於其中間。覓一毫新舊去來之相。了不可得。新舊去來之相。既不可得。叔季精神元似舊。慧慈面目只如新。來年年是去年年。今日日同明日日。雖然。只如北禪分歲。烹露地白牛。又作麼生。良久云。俗氣不除。

結夏。橫行海上。呼喚不回頭。方堪禁足。坐碧油幢。殺人不眨眼。始可護生。如是踞菩薩乘。如是修寂滅行。如是日中一食。如是夜後一寢。如是畚田。如是種粟。如是而行。如是而住。如是而坐。如是而臥。如是見得透。於一切處。無有不如是底時節。便是無足可禁。無生可護。無乘可踞。無行可修。一寢一食。蓋是尋常。種粟畚田。還同遊戲。雖然。猶是諸方普請邊事。雪峯如何。良久云。寒泉幸自清如鏡。莫遣纖塵點污伊。

冬節。晷運推移。日南長至。象骨峰前。貞祥遍地。枯木菴夜半糝花。寒泉水日中鼎沸。松山樹頭。躍出双双魚。磨香石上。迸出長長笋。今夜不免批此笋。劊此魚。插此花。酌此泉。管顧我見前一眾去也。諸人因甚渾不採著。卓拄杖一下云。美食不中飽人喫。

除夜。當頭坐斷。不求諸聖。不重己靈。線路放開。同乎流俗。合乎汙世。室內點燈。且終舊歲。樓頭吹角。又賀新年。胡張三黑李四。把手同懽。王大姐鄭道婆。挈家相慶。長裙拖地。帽子指天。東隣西舍。笑語喧譁。水曲山坳。往來絡繹。處處綠楊堪繫馬。家家門底挂燈毬。儼然古佛家風。觸目大人境界。普天和氣。市地春風。不離塵中。獨超象外。然雖如是。猶是尋常行履處。斬新一句。又作麼生。良久。夜來何處火。曉出古人墳。

解夏。心同虛空界。示等虛空法。還有結解也無。證得虛空時。無是無非法。還有去住也無。既無結解。又無去住。諸人一夏在這裏。行住坐臥。飲食起居。在這虛空內虛空外。這裏揀辨得出。許你證得虛空。便解向虛空裡。翻筋打斗。七縱八橫。以虎穴為伽藍。將魔宮作佛事。金龜潭底。推開紅日。象骨峯頂。漲起滄溟。鱉鼻拈來閃電中。剔起眉毛還不見。正恁麼時。是法不可得。非法不可得。虛空亦不可得。不可得亦不可得。大千沙界海中漚。一切聖賢如電拂。雖然。也須是實證得虛空始得。其或未然。豁達空撥因果。莽莽蕩蕩招殃禍。莫言不道。

冬節。六陰剝盡。寒則普天普地寒。一陽復生。熱則普天普地熱。諸人被寒熱所轉。老僧轉寒熱於目前。盛夏中。洒雪飛霜。窮冬裡。轟雷掣電。火官遽嘆水侵骨。青女俄驚暖似春。歲之餘閏。不較後先。月之大小。那知晦朔。臨機裁剪。信意安排。金剛圈栗棘蓬。時時供養諸人。鄭州梨青州棗。不能特地施設。吞得下吐得出底。夜夜上元。朝朝冬至。慶無不宜。吉無不利。其或未然。莫辭今夜醉。動是隔年期。

除夜。今歲今宵盡。日日日從東畔出。明年明日來。朝朝雞向五更啼。恁麼見得。威音已前亦如是。彌勒已後亦如是。咸淳五年。咸淳六年。亦如是。以至十年百年千年萬年萬萬年。亦如是。舊歲去未嘗去。新歲來未嘗來。梅開嶺上。似昔馨香。柳舞隄邊。如常顏色。堪笑北禪老把不定。剛道。年窮歲盡。無可與諸人分歲。且烹露地白牛。炊黍米飯。向檣柵火。唱村田樂。何也。免致倚他門戶傍他牆。却被時人喚作郎。這老漢雖則游刃肯綮。風馳電激。薄批細切。膾炙人口。爭柰筋骨滿地狼藉。直至而今收拾不上。雪峰今夜不免為他收拾去也。拈拄杖卓一下云。狼藉愈甚。

結夏。以大圓覺為我伽藍。蝦跳不出斗。身心安居平等性智。鈍鳥泊籬頭。若是俊快底。羅籠不住。呼喚不回。如倚天長劍。凜凜霜寒。如擘海金翅。胡往不利。縱橫自在。舒卷無拘。月沉水水沉月。無可寫之蹤。珠走盤盤走珠。無可留之影。呵叱留香尊者。謾自點胸點肋。竊笑斫牌玄沙。未知嶺外風光。一拳拳倒黃鶴樓。一踢踢翻四大海。雖然。且道。我此一眾。還有個樣衲僧麼。良久云。喚來與老僧洗脚。

冬至。六花峯頂。光搖銀海眩生花。三山城中。凍合玉樓寒起粟。惟有寒泉皎潔。古澗冷然。澄不清。攬不濁。取無禁。用無竭。夏熱也恁麼。冬寒也恁麼。陰極也恁麼。陽生也恁麼。逗到臘月三十日。明年更明年。以至百千萬億年。也只恁麼。雖然。只如祖師道。瞪目不見底。趙州道苦。二員古佛。還有優劣也無。良久云。夏之日。冬之夜。

除夜。臘月二十八九。家家戶戶盡有。不是北禪露地牛。便是清源白家酒。羅列杯盤。同權共笑。惟有雪峰。清寥寥自滴滴。死火寒灰大家□□。雖然。今夜豈可空過。拈拄杖云。未免倩拄杖子。作化菩薩。前往兜率內院天廚裡許。借取醍醐上味瓊漿玉液。管顧我見前一眾。拄杖子。於是奉命而行。到慈氏菩薩所。頭面禮足。具陳上事。以七寶鉢。盛滿上味而回。豎起杖云。見麼。擲下云。即今拋向諸人面前。一任饜飽取足。無令後悔。是則是。須是舌頭具眼者。方可取食。其或未然。醍醐上味。為世所珍。遇斯等人。翻成毒藥。

結夏。一屙便了。狼藉不堪。眨上眉毛。早已蹉過。擊石火。閃電光。搆得搆不得。未免喪身失命。除非知有。莫能知之。雖然。官不容針。私通車馬。所以道。言語動用沒交涉。非言語動用。亦沒交涉。若向言語動用中搆得。是第三句。非言語動用中搆得。是第二句。且道。如何是第一句。諸人若也知得。當甚破草鞋。其或未然。百二十日長期。快著脚手。晝裡夜裡。茶裡飯裡。動裡靜裡。東卜西卜看。忽然卜著也不定。

解夏。一物不為。切忌坐在這裡。重關既透。更須轉過那邊。所以道。寸絲不挂。赤肉猶存。萬里無雲。青天尚在。一毫頭聖凡情念未盡。未免入驢胎馬腹裡去。一毫頭聖凡情念淨盡。亦未免入驢胎馬腹裡去。恁麼見得。剋期取證。掘地覓天。驗定蠟人開眼作夢。天童這裡。萬年一念。一念萬年。眼挂枯松。苔封古路。百二十日前

也恁麼。百二十日後也恁麼。百二十日裏也恁麼。二時清水白米外。斷不敢加一毫外料。葛參諸人。幸而諸人水乳和同。善自保愛。如崑山玉。似麗水金。纖瑕微翳。了不可得。真實貴重。無可議者。雖然。一夏空過耶。不空過耶。良久云。幻人相逢。撫掌呵呵。

冬節。地凍天寒。双沼澄澄浸月。陰剝陽復。萬松鬱鬱吟風。君子道長。寒谷生春。小人道消。冰河起焰。衲僧門下。長也不可得。消也不可得。剝也不可得。復也不可得。獨超象外。不墮塵中。晝明夜暗。此則晝夜一如。春妍秋靖。此則春秋不涉。不是無寒暑處。亦非超究竟天。或謂空劫前。或曰然燈後。包萬有而無迹。含六虛而不痕。活鱗鱗絕羅籠。赤洒洒脫窠臼。諸人十二時中。全體在裏許受用。莫有知得底麼。若也知得。鄭州梨青州棗。信手拈來。東咬西咬。其或未然。遂高聲云。侍者掇退菓卓。

結夏。踞菩薩乘。蹲身荒草。修寂滅行。刺腦膠盆。所以雲門道。我事不獲已。向你諸人道。直下無事。早是相埋沒了也。何況開粥過夏。商量兩錯。寧免辜負自己。屈物平人。天童這裏。只據見定。玲瓏岩上石。大底大小底小。雨洗光生。潘家園裡竹。短底短。長底長。風來翠舞。無勞揀擇。不涉安排。諸人一見便見。九十日內。飢飡渴飲。倒臥橫眠。有什麼過。其或未然。夏月多螻螿。慈悲觀地行。

解夏。三月安居。白刃滿前常坦坦。九旬禁足。胡塵眯目只如如。如無似有。降伏鏡裏魔軍。將有作無。成就夢中佛事。牯牛嘗甘水草。蠟人幸得完全。且無一事到心頭。但見萬松桂眼底。池內游魚。三个五个。林間幽鳥。一聲兩聲。夕陽樵唱嶺頭雲。靜夜漁歌江上月。向上向下。未曾將口輕輕道著。全提半提。儘教諸方浩浩商量。雖然。好一釜羹。切忌鼠糞浣却。以拂子擊禪床云。今夜無端打落兩顆。

冬夜。三玄宗要。瓦礫場中。不輟舉揚。五位君臣。斤斧聲中。慣嘗拈掇。玉線金針。當陽顯赫。電光石火。觸目輝騰。正偏回互。繩墨下轉見乖張。棒喝交馳。普請處非常狼藉。是處是慈氏。無門無善財。妙高臺塞破十虛。光明藏融通三際。有甚陰剝陽復。暑往寒來。清關別是一壺天。抹過威音空劫外。恁麼會得。已非俊流。更待小參。重新告報。堪作什麼。雖然。莫恠山翁無伎倆。祇將官路當人情。

結制。十五日已前。欲證圓覺。未極圓覺。十五日已後。終日圓覺。未嘗圓覺。正當十五日。具足圓覺。住持圓覺。諸人。若向這裏會得。一夏九十日。日日無虛弃工夫。一日十二時。時時有斬新活計。舉足下足。覺無不圓。這邊那邊。圓無不覺。只如圓是菜園。覺是牛角。又作麼生。良久云。三十三天踢氣毬。

解制。上無攀仰。下絕己躬。坐斷千差。壁立萬仞。激之不濁。揚之不清。攬之不動。撥之不轉。九旬禁足。朝游東土。暮往西天。三月護生。逢佛殺佛。逢祖殺祖。天魔落膽。外道摧心。凜凜神威。阿誰敢擬。住則便住。千年推不去。去則便去。萬牛挽不回。融大千沙界於一塵。會十世古今於當念。橫該豎抹。七穴八穿。正恁麼

時如何。如王寶劔隨王意。揮斥縱橫得自由。

拈古

僧問興化。四方八面來時如何。化云。打中間底。僧禮拜。化云。昨日赴村齋。中路遇暴風卒雨。却向古廟裡禪得過。

師云。善竊者鬼神不知。興化向古廟裡禪得過。擬圖謾得這僧。殊不知。却被鬼神覷破。要做臨論白拈種草。且緩緩。

洞山示眾云。秋初夏末。兄弟東去西去公案。

師云。洞山恁麼道。全身已墮草窠裡了也。石霜雖然盡力相扶。畢竟也扶不起。東山即不然。秋初夏末。兄弟東去西去。切忌向萬里無寸草處去。何故。臥龍長怖碧潭清。

陳操尚書。一日訪資福。福見來。便畫一圓相。尚書云。弟子恁麼來。早是不著便。那堪更畫圓相。福於中著一點。尚書云。將謂是南蕃船主。資福便歸方丈。閉却門。

師云。大開東閣。延接高賓。資福手頭不吝。進之以禮。退之以義。尚書逸格作家。只如末後尚書道。將謂是南蕃船主。資福便歸方丈閉却門。意恁麼生。良久云。伯牙與子期。不是閑相識。

昔有一秀才問趙州。佛不違一切眾生之願。是否。州云是。才云。乞和尚手中杖子得麼。州云。君子不奪人所好。才云。我非君子。州云。我亦非佛。

師云。嘗聞。古者道。可以取。可以無取。取傷廉。可以與。可以無與。與傷惠。未以為然。今觀二人。一卷一舒。一放一收。前言信之矣。

昔有一秀才。問長沙岑和尚。百千諸佛。但聞其名。未審。居何國土。沙云。黃鶴樓崔浩題後。秀才曾題否。才云不曾。沙云。無事題取一篇好。

師云。秀才向舌頭上。放出百千諸佛光明。因甚不知所居國土。且道。長沙還知麼。若道知。必不恁麼答。若道不知。必不恁麼答。惠力分明為諸人道破。良久云。會麼。黃鶴樓前無限意。得閑題取一篇詩。

同安問僧。甚處來。(視其所以)僧云。五臺。(詣實供通)同安云。還見文殊麼。(觀其所由)僧展兩手。(文殊文殊)同安云。展手頗多。文殊誰覷。(察其所安)僧云。氣急殺人。(不可更有二文殊)同安云。不覷雲中鴈。焉知沙塞寒。(人焉廋哉。人焉廋哉)僧云。遠趨丈室。乞師一言。(不可放過)同安云。孫臏門下。徒話鑽龜。(形於未兆。見於未然。狼藉不少)僧云。名不浪施。(克由叵耐)同安云。喫茶去。(前倨後恭。是何心行)僧珍重便出。(作家作家)同安云。雖得一場榮。別却一雙足(放過不可)。

師云。視其所以。觀其所由。察其所安。同安以之。造次必於是。顛沛必於是。這僧以之。雖然。同安末後道。雖得一場榮。別却一雙足。是肯這僧。不肯這僧。

永嘉大師見曹溪一宿公案。

師云。李白不攀丹桂。直入翰林。永嘉一宿曹溪。橫行祖域。雖然如是。平地喫交。

德山示眾云。問著即錯。不問猶乖。時有僧出禮拜。山便打。僧云。某甲話也未問。何得打某甲。山云。待你開口。堪作什麼。

師云。德山令下。雷破山風振海。有所不知。這僧勇為。赴湯火蹈白刃。有所不顧。惜乎。只是有眼無耳朵底漢。使其當時聞得待你開口堪作什麼。便與掀倒禪床。直饒德山棒如雨點。也只得束之高閣。

古德道。入息不居陰界。出息不涉萬緣。常轉如是經百千萬億卷。

師云。古人恁麼。可煞奇特。點檢將來。未免覺礙為礙。而不自在。松溪。息黥補劓。有个道處。入息居陰界。出息涉萬緣。常轉如是經。不動著一字。

趙州。一日向雪中倒。叫云。相救相救。時有僧。便去身邊臥。趙州便起去。

師云。放憨賣[立*肖]。趙州慣得其便。所幸撞著這僧。若是今時師僧。冷眼相看。殊不採著。趙州要起去。且緩緩。

僧問趙州。學人乍入叢林。乞師指示。州云。喫粥了也未。僧云。喫粥了。州云。洗鉢盂去。其僧有省。

師云。將常住物當人情。趙州惠而不費。平地等閑歸閻苑。這僧事出偶然。雖然如是。二俱鈍置。

東寺問仰山。甚處人。(相見之初。不容不問)仰云。廣南人。(着實祇對)寺云。聞說廣南有鎮海明珠。是否。(就身打劫)仰云是。(披襟承當)寺云。此珠作何形狀。(恐未真實。難為模邈)仰云。白月即現。黑月即隱。(道地所產。宛爾不同。果然)寺云。將得來麼。(隨身受用)仰云。將得來。(已傾出了也)寺云。何不呈似老僧。(猶嫌少在)仰云。昨到瀉山。蒙索此珠。直得無言可對。無理可伸。(滿地狼藉。好與三十棒)寺云。真師子兒。善能哮吼。如蟻螟虫。向蚊子眼睫上作窠。於十字街頭。大叫云。土曠人稀。相逢者少(惡水潑人。掀倒禪床)。

師云。可惜二俱不了。東寺末後。若能據令而行。方見具向上爪牙。不謬為真師子子。仰山聞東寺恁麼道。若能翻轉面皮。亦免得鎮海明珠。只作豌豆糶却。

歸宗南泉麻谷禮觀國師。於路上畫圓相公案。

師云。三人行必有我師焉。擇其善者而從之。今觀南泉歸宗麻谷如是。斯言不誣矣。

圓悟陞堂。舉僧問雲門。如何是諸佛出身處。門云。東山水上行。今日忽有人問天寧。如何是諸佛出身處。薰風自南來。殿閣生微涼。大慧在座下聞之。豁然大悟。

師云。這僧問處。□過威音已前。雲門答處。相去彌勒不遠。後來圓悟恁麼道。可謂通其變使民不儘。只如大慧悟去時如何。入地獄如箭射。

清平問翠微。如何是佛法的大意。微下禪床。引清平入竹園。指云。這一竿得恁麼長。那一竿得恁麼短。清平於是有省。

師云。翠微引清平入竹園。未免善因而招惡果。

臨濟示眾云。有一人常在途中不離家舍。一人常在家舍不離途中。

師云。臨濟恁麼道。果然只具一隻眼。盡大地撮來。如粟米大。甚處得途中家舍。

松源示眾云。有時堆堆坐禪。有時一向打闕。年來行脚衲僧。都是這般病痛。報君知休打闕。入門[拚-厶+去]却箇渾身。頭頭自有生蛇弄。

師云。松源恁麼道。雖則切中。今時衲子膏肓。未免執之失度。龍峯即不然。打闕坐禪。坐禪打闕。病痛一般。一般病痛。不坐禪不打闕。如箭射地。發無不中。

雲門大師道。釋迦老子。與天帝釋。在中庭相爭佛法正闕。

師云。雲門大似青天白日眼見鬼。好與三十棒。然雖如是。真實不虛。

洞山示眾云。須知有佛向上事。時有僧問。如何是佛向上事。山云非佛。雲門云。名不得。狀不得。所以言非。

師云。洞山初解題目。雲門後釋本文。若是正經。一點不曾動著。或有人問龍峯。如何是佛向上事。只向他道。佛也不知。

梁山示眾云。南來者與三十棒。北來者與三十棒。雖然如是。不當宗乘。後來瑯琊道。可惜。梁山一片真金。作頑鉄賣却。瑯琊即不然。南來者三十棒。北來者三十棒。一任天下衲僧貶剝。

師云。瑯琊只知梁山將真金作頑鉄賣。殊不知自己把真珠作豌豆糶。龍峯即不然。南來者一任南來。北來者一任北來。三十棒。未到你在。

夾山定山同行。論生死中有佛無佛公案。

師云。生死中有佛。平地起堆高突兀。生死中無佛。大海無風波浪作。親者不問。問者不親。大梅分曉成湍[泳-永+盾]。不迷生死無生死。定山夾山何太錯。錯錯。瘡病不假驢駝藥。

文殊三處度夏。迦葉白槌擯出。乃見百千文殊。迦葉用盡神通。槌不能舉。世尊云。你擬擯出那个文殊。迦葉無對。

師云。七佛祖師敗缺處。被金色頭陀點檢。金色頭陀敗缺處。被黃面瞿曇點檢。黃面瞿曇敗缺處。今日被集雲點檢。且道。集雲敗缺處。還有人點檢得麼。良久云。眾眼難瞞。

僧坦然問安國師。如何是祖師西來意。國師云。何不問取自己意。然云。如何是自己意。國師云。當觀密作用。然云。如何是密作用。國師。以目開合示之。然。於言下知歸。

師云。譬如琴瑟箜篌。須有妙音。若無妙指。終不能發。今觀國師之於坦然。不其然乎。

雪峯夏滿。於僧堂前坐。眾纔集。峯拈起拄杖云。我這個為中下根人。有僧問。或遇上上根人來時。又作麼生。雪峯便打。

師云。象骨老人。竊得周金剛一條白棒。收來放去。足有可觀。惜乎。不曾打著上上根人。總似這般師僧。打得千萬个。有什麼益。集雲這裏。莫有上上根器底麼。卓拄杖一下云。比擬張麟。兔亦不遇。

雪峯。一日問安國韜云。盡乾坤是個解脫門。把手教伊入。不肯入。韜云。和尚恠某甲不得。峯云。爭奈背後許多師僧何。

師云。千五百人善知識。眼通三世。氣宇如王。凡出一言施一令。不問有情無情。若草若木。惟恐奉承之不暇。因甚被安國道个恠某甲不得。直得顧左右以言他。何也。龍蛇易辨。衲子難瞞。

黃蘗開田次。百丈問云。運闍黎開田不易公案。

師云。和之煦之。霜之雪之。雄峯父道。不為不明。善繼其志。善述其事。黃蘗子職。不敢不勉。雖然父子酬唱。足有可觀。謂得大機之用。三生六十劫。

僧問報慈。承古有言。情生智隔。想變體殊。只如情未生時如何。慈云隔。僧云。情既未生。隔个什麼。慈云。這梢子未遇人在。

師召大眾云。獅子咬人。韓獪逐塊。

丹霞參南陽忠國師。方展坐具。國師云。不用不用。(賓主歷然)丹霞退身三步。國師云。如是如是。(賓則始終賓。主則始終主)丹霞進前三步。國師云。不是不是。(賓中有主。主中有賓)丹霞遶禪床一匝而出。國師云。去聖時遙。人多懈怠。三十年後。討這個師僧。也難得(全賓全主。全主全賓)。

師復召大眾云。要見二大老麼。暮逢敵手難藏行。詩到重吟始見工。

金峯示眾云。事存函盖合。理應箭鋒拄。還有人道得麼。若有人道得。老僧分半院與他住。(易開終始口。難保歲寒心)時有僧出禮拜。峯云。相見易得好。共住難為人。便歸方丈(果然)。

師云。諸人要識金峯麼。雖有周公之才之美。使驕且吝。其餘不足觀也矣。

臨濟中夏。上黃蘗問訊。(舊病再發)見黃蘗看經次。乃云。將謂是箇人。元來淹黑豆底老和尚。(只好棒打趁出)住數日。乃辭去。(姦人多詐)蘗云。汝破夏來。何不終夏了去。(醍醐毒藥)濟云。暫來禮拜和尚。(棺木裏瞠眼)蘗便打趁令去。(惜乎太遲)臨濟行數里。疑此事。却回終夏(敗也敗也)。

師復云。黃蘗當時若能一向牙關咬定。教這風顛漢子。更疑三十年。

福州烏石靈觀禪師。因新到來參。偶引麪示之。(美食不中飽人喫)其僧便出。(果然)觀。晚間問首座。新到在什麼處。(不可放過)座云。當時便去。(從來疑着這漢)觀云。是

即是。只得一櫛(放過不可)。

師復云。老雀爪下分餐。不道不是。俊鷹快鷄。爭免末後被他一啗。直至而今動不得。

雪峯示眾云。看看東邊底。看看西邊底。汝若要會。拋下主杖云。向這裏會取。

師呵呵大笑云。真覺祖師。苦苦抑逼人作什麼。山僧即不然。日中有飯教你喫。夜後有床教你眠。但管自倒自起。休看東邊西邊。會與不會。拈放一邊。何故。鵠不待粉而後白。烏不假墨而後玄。

長沙一日遊山回。首座問云。和尚甚處去來。沙云。始隨芳草去。又逐落花回。首座云。大似春意。沙云。也勝秋露滴芙蓉。

師云。大小岑大虫。却向平田淺草裏輓。當初待他問和尚向甚處去來。便與劈臂一踏。不惟截斷許多葛藤。亦免後人向去去來來處卜度。

雪峯普請破柴次。燒一堆火云。大眾進前向火。時長慶。拋一櫛柴向火中云。與和尚結緣。

師云。破柴燒火。雪峯忒煞傷慈。拋柴結緣。長慶無禮太甚。當時忽被雪峯道。別處容你不得。又作麼生。

雪峯一日召玄沙云。備頭陀何不遍參去。沙云。達磨不來東土。二祖不往西天。雪峯然之。

師云。大小雪峰。龍頭蛇尾。當時見他恁麼道。好與三十棒。何故。誣人之罪。以罪加之。

玄沙。一日見三人新到。自去打普請鼓三下。却歸方丈云。新到被我勘破了也。

師云。黨理不黨情。黨義不黨勢。龍峯敢道。玄沙恁麼勘破新到。失却一隻眼。滄山問仰山。子一夏不見上來公案。

師云。君臣父子之間。天下真情所在。滄仰恁麼互相徵詰。是真情耶。非真情耶。有人知得二大老落著。許你具擇法眼。其或未然。且聽諸方斷看。

北禪分歲烹露地白牛公案。

師云。羹藜含糗者。不足與論太牢之滋味。當時不得遇上座。北禪烹个露地白牛。幾成虛設。具眼者辨取。

僧問智門。蓮華未出水公案。并舉雪竇頌。

師云。和氏場中美玉。價重連城。及乎雕琢將來。分文不直。或有人問蓮花未出水時如何。一花一葉。出水後如何。一葉一華。且道。與古人是同是別。

僧問乾峯。十方薄伽梵。一路涅槃門。未審路頭在什麼處。峯以拄杖劃一劃云。在這裏。其僧將此語。請益雲門。門云。扇子[跳-兆+孛]跳上三十三天。築著帝釋鼻孔。東海鯉魚打一棒。雨似盆傾。

師云。伏羲畫卦。文王重爻。一人發端於其前。一人成終於其後。易道之妙。方始著見。今觀二大老恁麼指示。不亦宜乎。

三聖問雪峯。透網金鱗以何為食公案。

師云。有大鵬垂雲之翼。始可以搏九萬里扶搖。非九萬里扶搖。不足以展大鵬垂雲之翼。舍二大老。其將誰歸。雖然。未知有向上一著在。

頌古

教中道。大通智勝佛。十劫坐道場。佛法不現前。不得成佛道。

劫初鑄就毗盧印。古篆雕虫尚宛然。堪笑堪悲人不識。却嫌字畫不完全。

楞嚴經云。見見之時。見非是見。見猶離見。見不能及。

荷盡已無擎雨蓋。菊殘猶有傲霜枝。一年好景君須記。正是橙黃橘綠時。

文殊是七佛之師。因甚出女子定不得。

絕毫絕釐。日面月面。號令四馳。凡行草偃。拔山超海杳無蹤。風從龍兮雲從龍。

。

僧問洞山。寒暑到來。如何回避。山云。何不向無寒暑處去。僧云。如何是無寒暑處。山云。寒時寒殺闍黎。熱時熱殺闍黎。

無寒暑處報君知。不離寒時與熱時。熱則乘涼寒向火。不須回避不須疑。

僧問風穴和尚。語默涉離微。如何通不犯。風穴云。常憶江南三月裏。鷓鴣啼處百花香。

鷓鴣啼處百花香。劫外風光不覆藏。往往遊人多蹉過。却從上苑探羣芳。

僧問曹山。世間什麼物最貴。曹山云。死猫頭。僧云為什麼死猫頭却貴。山云。無人酬價。

不堪提掇死猫頭。日炙風吹臭未休。底事罕逢人著價。只緣貴重世無儔。

雪竇和尚。在南岳福巖。為藏主。李殿院。同雅長老。入藏院。師出接。時有道士秀才到。殿院遂問云。三教中。那教最尊。雪竇側身而立。殿院云。有口何不道。雪竇云。對夫子難言。

不落宮商太古音。無勞絃上發清聲。高山流水有餘意。除却子期誰解聽。

朱行軍。到南際寺齋僧。行香次。乃云。直下是直下是。時有濟上座云。直下是個什麼。行軍便喝。濟云。行軍幸是佛法中人。惡發作什麼。行軍云。你作惡發會那。濟便喝。行軍亦喝。濟云。鈎在不疑之地。

直下是直下是。上是天下是地。日暖風和。花酣柳醉。玉笛纔轟。朱絃奏起。音響和同一會家。相逢彼此各天涯。

藥山。一日坐次。石頭問云。汝在這裏作什麼。山云。一物不為。公案。

一物不為。千聖不識。靜夜霜鐘。澄潭秋月。清音絕聽。清影難窺。藥嶠石頭曾未知。

臨濟栽松。黃蘗問云。深山裏[栽-木+土]許多樹作麼。濟云。一與山門作境致。二與後人作標榜。公案。

臨濟栽松。一椎兩當。山門境致。後人標榜。鋤頭打地。滅却吾宗。陰涼大樹起清風。

僧問馬大師。如何是佛。大師云。即心是佛。

即心是佛。砒霜狼毒。起死回生。不消一服。

院主問馬大師。尊位如何。師云。日面佛月面佛。

和尚尊位如何。突出日面月面。光艷燦破乾坤。五眼覷之不見。覷得見。何似尋常臘月扇。

僧問九峯虔和尚。如何是學人自己。峯云。更問阿誰。僧云。便恁麼承當去時如何。峯云。須彌還更戴須彌麼。

自己將來更問誰。須彌還更戴須彌。九峯末上能行令。免得重重涉水泥。

僧問疎山。如何是冬來意。山云。京師出大黃。

白雲鼓起沒絃琴。一曲冬來意甚深。清韻至今猶未泯。江南江北少知音。

文殊三處度夏。迦葉白槌擯之。槌不能舉。

金毛獅子奮全威。百億毛頭獅子兒。不是飲光槌不舉。惜伊無地可埋屍。

龐居士辭藥山。山命十人禪客相送。至門首。士指空中雪云。好雪片片。不落別處。公案。

龐公幸是一家人。藥嶠何須禮過勤。只為禮繁偏致亂。那堪雪也落紛紛。

龐居士問馬大師。不與萬法為侶者。是什麼人。大師云。待汝一口吸盡西江水。即向汝道。

萬法不為侶。一口吸西江。玉磬纔槌動。金鐘應手撞。三三元是九。兩兩不成雙。此意憑誰委。令人憶老龐。

臨濟示眾云。赤肉團上。有一無位真人。公案。

無位真人活鱗鱗。赤肉團上為窠窟。縱橫妙用可憐生。七出八沒難捉摸。推不去挽不住。擬議尋思無覓處。無覓處在這裏。遂握起拳云。見麼。良久云。握則一拳。復展開云。開則五指。

閩王問雪峯。擬蓋一所殿去時如何。峯云。大王何不蓋取一所空王殿。王云。請師樣子。雪峯展兩手。雲門道。一舉四十九。

真覺祖師展兩手。雲門一舉四十九。空王殿已峭巍巍。千古萬古猶仍舊。

趙州訪二菴主公案。

老倒趙州無本據。翻手為雲覆手雨。覷面當機不覆藏。往往少人知落處。知落處。是甚閑家具。

臨濟辭黃蘗公案。

烏藤約住未為過。禪板焚來也是閑。最喜河南與河北。雷轟一喝誑癡頑。
僧問法眼。如何是曹溪一滴水。眼云。是曹溪一滴水。其僧惘然。時韶國師在座下。聞之有省。

武帝求僊不得僊。王喬端坐却升天。有心用處還應錯。無意求時又宛然。

黃蘗。一日普請。鋤蕙穀次。臨濟在後行。蘗回頭見濟空手。乃問。鑊頭在甚麼處。濟云。有人將去了也。蘗云。近前來。共汝商量。濟近前叉手。蘗豎起鑊頭云。只這個天下人拈掇不起。還有人拈掇得麼。濟就手掣得。豎起云。為什麼。在義玄手裏。蘗云。今日自有人普請。便歸院。

蘗山養子忒婆心。斫了摩拏不憚勤。悖逆兒郎渾不顧。鑊頭掣得氣凌雲。

雲居問雪峯云。門下雪消也未。雪峯云。一片也無。消个什麼。雲居云。消也。雪裡垂絲古釣臺。錦鱗拂拂上釣來。舡頭撥轉歸何處。又向蘆花深處挨。
僧問泐潭興禪師。如何是曹溪門下客。師云。南來燕。僧云。學人不會。師云。養羽候秋風。

曹溪門下南來燕。終日呢喃話祖翁。話盡離微人不會。不如養羽候秋風。

僧問古德。雪覆千山。因甚孤峯不白。古德云。須知有異中異。

雪覆千山未厭多。孤峯不白意如何。單單突出千峯外。似異還同永不麼。

趙州問二新到。上座曾到此間否。云不曾到。趙州云。喫茶去。又問。那一人曾到此間否。云曾到。州云。喫茶去。院主問。不曾到。教伊喫茶去則且置。為什麼曾到。也教伊喫茶去。州召院主。院主應喏。州云。喫茶去。

來去客情千樣別。高低主禮一般施。相逢不飲空歸去。明月清風也笑伊。

僧問古德。風性常住。無處不周。意旨如何。古德遂搖扇。其僧有省。

風性無周無不周。手中扇子等閑搖。風前吹起無根樹。不作桑條作柳條。

僧問香林。如何是衲衣下事。林云。臈月火燒山。

縱火燒山臘月時。衲衣下事為全提。幾多撥草瞻風底。燎盡眉毛總不知。

滄山問仰山。天寒人寒。仰山云。大家在這裏。滄山云。何不直說。仰山云。適來也不曲。

滄嶠冬天轟霹靂。仰山夏月降嚴霜。鐵鎚兩箇都無孔。打就乾坤自[病-丙+斯]當

。雲門垂語云。且道。古佛與露柱相交。是第幾機。自代云。南山起雲。北山下雨。

發機外機。遣句中句。明眼衲僧。不知落處。知落處。南山起雲。北山下雨。

雲門垂語云。人人盡有光明在。看時不見暗昏昏。作麼生是諸人光明。自代云。厨庫三門。又云。好事不如無。

水中鹽味渾相似。色裏膠青不較多。暗不謂無明不有。看時不見轉謗訛。沒謗訛。太平何必動干戈。

趙州問南泉。離四句絕百非。請和尚道。南泉下座。便歸方丈。公案。

電光石火箭鋒機。父倒行兮子逆施。力敵勢均難辨別。一双無孔鐵門槌。

僧問古德。年窮歲盡時如何。古德云。東村王老夜燒錢。

烏飛兔走晝還夜。臘盡春回年復年。無盡無窮窮盡處。東村王老夜燒錢。

臨濟在黃蘗[栽-木+土]松公案。

將鋤打地自拋屙。怎奈熏天臭氣何。老倒蘗山禁不得。却將伊頂再三摩。

僧問趙州。如何是和尚家風。州云。高聲問老僧耳背。僧高聲問。州云。你問我家風。我識你家風。

問我家風。識你家風。將謂耳背。元來耳聾。指南為北。問西答東。阿呵呵。趙州恰恰似天童。

普說

無外一精明。六合同出自。若能知本原。佛亦不相似。諸人還知本原麼。無外一精明。是也。此一精明。馬祖所謂即心即佛。南泉所謂不是心不是佛不是物。臨濟所謂一無位真人。常在汝等面門出入。是也。名雖異。體則同。說雖別。意不別也。所謂六合同出自者。眼與色合。耳與聲合。鼻與香合。舌與味合。身與觸合。意與緣合。教中道。元是一精明。分成六和合。是也。若能知本原。佛亦不相似。殊不知。知了本原。蘊在胸次。正是大病。要得快活。須是忘却此知可也。此六根門。雖與六塵合。然造道之士。舍此無由而入。所以靈雲遍參三十餘年。一日忽見桃花。便道。自從一見桃花後。直至如今更不疑。香嚴久居南陽菴。因除瓦礫。擊竹作聲。當下省發。乃云。一擊忘所知。更不假修持。百丈。被馬祖扭鼻頭。忍痛失聲。因而瞥地。看得從上佛祖以來。入道蹊徑。非但六根。如楞嚴會上。五五開土。或從六根而入。或從六塵而入。或從六識而入。及乎所證。無二圓通。諸人逐日坐臥經行。總在裏許。剗地蹉過。往往握節當胸。却向曲肱床上老禿口頭取辦。是則名為可憐憫者。雖然。見聞覺知是道。道離見聞覺知。若守住見聞覺知。不肯放捨。所謂見聞不脫。如水中月。不見。百丈侍馬祖行次。見野鴨子飛過。祖云。是什麼。丈云。野鴨子。祖云。什麼處去也。丈云。飛過去也。祖遂扭百丈鼻頭。丈作忍痛聲。祖云。何曾飛去。丈因而有省。次日。祖陞堂。丈出來卷席。百丈貧兒乍富。氣宇如王。殊不知脚跟下紅線未斷在。後來再參。侍立次。祖以目視禪床角拂子。丈云。即此用。離此用。祖

云。你向後開兩片皮。將何為人。丈取拂子豎起。祖云。即此用。離此用。丈挂拂子於舊處。祖震威一喝。百丈直得三日耳聾。噫。百丈若無這末後一解。未免一生只在聞見裏著到。安有獨坐大雄峯底消息。尋常室中。每見兄弟來。下咄下喝。豎指擎拳。或撫掌。或點頭。或提起坐具。做盡伎倆。老僧未免向化道不是。多是不意而去。噫。兄弟。老僧向你道是。未必是。向你道不是。未一不是。若自家手中握底。果是一塊真金。管人道是與不是。作什麼。昔有一僧。到章敬。遶禪床三匝。振錫一下。敬云。是是。又到南泉處。依前如是。泉云。不是不是。此是風力所轉。終成敗壞。僧云。章敬道是。和尚為什麼道不是。泉云。章敬即是。是汝不是。蓋緣這僧病在見聞覺知處。被南泉輕輕點破。更去不得。初非南泉強移換他。自是他未到脫離見聞之地。所以道。百尺竿頭立底人。雖然得入未為真。百尺竿頭須進步。十方世界露全身。這裏莫有百尺竿頭能進步底麼。若有。遇桂牌日。來吐露看。

法語

示淨明月長老

百丈已前。無住持事。刀耕火種。隱遁過時。學者聞其風而師之。主伴相依。力究己事。捍勞忍苦。不易初心。願力既堅。大法明悟。深藏密護。不忍輕售。一朝為人所迫。踞曲彙床。自然光明盛大。照映千古。所謂根本固則枝葉茂也。去古既遠。人根益浮。纔與僧倫。便作住院之想。一旦為人所誤。打自大鼓。任情肆意。撥無因果。及乎緣謝。其為則闕。有不可勝言者。蓋由初心不根於道。名利所牽。差之毫釐。謬以千里也。長老。早歲出家。早歲行脚。叢林去處。亦已遍歷。時節既至。操住山斧。固非分外。然。院無大小。弘之在人。儻以從上佛祖為標格。切切行持。雖對聖僧喫飯。亦無媿矣。何患檀信不歸美。聲名不馨香。龍天不加被。四恩不畢報。夫如是。稱曰長老。豈徒然哉。佛祖三經寄去。每日得暇。披翫一遍。依而行之。轉以授人。庶不忝為黃面老子兒孫也。至祝至祝。

示果侍者

道在日用常行之間。然即日用常行以為道。固不可。離日用常行以為道。亦不可。視聽言動。飲食起居。無一或妄。無一或非。不為氣所便。不為境所奪。不以廣聞博見為己解。不以奇言妙語當本參。似兀如癡。只守閑閑地。如鴈過長空。影沉寒水。鴈無遺蹤之意。水無沉影之心。視昔趙州文遠。鬪劣不鬪勝。似金博金。國師耽源。三呼三應。如水與水。直饒恁麼。更須知有衲僧門下。佛祖柰何不得底一著。然後入魔入佛。無可不可。逆行順行。等皆方便。雖然。也須是一回汗出始得。若果得一回汗出。白雲所謂。一莖草上。現玉殿瓊樓。豈虛語哉。果侍者。兩地相從。恰半十載。燒香問訊。了無錯謬。更能向上加鞭。不惟拍肩文遠耽源。高出一頭地。乃善臨別需語。為日用警。因其請而告之。

示龍維那

祖師西來。教外別傳。不立文字。單提獨掇。不過只要人去却胸中物。喪盡日前機。知得自己一段光明。亘古亘今。照天照地。處聖不增。居凡不減。不以夜而晦。不以晝而明。十日難眎。千手難掩。即此謂禪非禪也。即此謂道非道也。離此別求。大似去河覓水。捨燈求火也。所以迦文老漢。雪嶺六年。纔見明星之後。便云。一切眾生。具有如來智慧德相。但以妄想執著。而不能證得。子細看來。即今高打行纏。挑包行脚。妄想也。江上江南。尋師訪道。妄想也。終日面壁。坐破蒲團。妄想也。朝參暮請。廢寢忘食。妄想也。總不恁麼。須是個猛烈底漢。纔聞舉著。如鷹搦兔。似鷗拏鳩。披襟承當。赤手荷負。未為分外。然雖如是。切忌坐在這裏。更須知有轉身底時節始得。所以道。百尺竿頭立底人。雖然得入未為真。百尺竿頭須進步。十方世界露全身。且道。百尺竿頭。如何進步。豈不見。興化和尚。一日謂克賓維那曰。汝不久為唱道之師。賓曰。某甲不入這保社。興化云。會了不入。不會不入。賓曰。總不恁麼。興化便打。乃云。克賓維那。法戰不勝。罰錢五貫。設饋飯一堂。至明日。興化白槌云。克賓維那。不得喫飯。即便出院。只如興化恁麼。意在於何。為人須為徹。殺人須見血。克賓恁麼。又作麼生。路遙知馬力。歲久見人心。雖然。百尺竿頭。二俱進步未得在。

示宗侍者

我宗無語句。亦無一法與人。德山老漢恁麼道。已是狼藉不少。既無語句。一法亦無。畢竟以何為我宗。若非吹滅紙燭處。喪盡鬼家活計。安能赤手空拳。別立生涯。一條白棒。佛來也打。祖來也打。以至拆佛殿遣羅漢。見處諦當。用處軒豁。如疾雷迅風。破山震海。無你近傍處。無你睥睨處。豈近世央庠淺根之士。可得而彷彿耶。傳云。希顏之人。亦顏之徒歟。若是俊流。壁立萬仞。一日千里。得失不顧。危亡不知。寬作程限。急著脚手。期於徹證。到佛祖不到之地。見佛祖未見之處。特立獨行。孤風凜凜。如獅子出窟。踞地哮吼。群狐屏跡。假使周金剛再世。亦當讓雄也。切宜勉旃。

佛祖讚

出山相

天將有大任于厥躬。必先苦其心志。勞其筋骨。餓其體膚。不然。爭得二千有餘載。百億四天下。仰之如日星。愛之逾父母乎。

觀音

耳門圓照。日月兩間。悲願洪深。衣被四海。方便智慧。靡不圓融。見聞覺知。無能障礙。人間天上獨優游。是則名為觀自在。

馬郎婦

雲開天竺。月照金沙。心心妙法。念念蓮華。未必將身許馬家。

魚籃

鱖喇籃中活錦鱗。風前提起不辭頻。幾回遶盡長沙市。賣與買人無買人。

文殊

或草為衣。或獅為輿。千變萬化。無二文殊。雖然覓則不可得。五臺山色猶如如。

布袋

逢人乞一文。袋裏敵國富。不是下生遲。嫌佛不肯做。

達磨

西來十萬里。北渡一莖蘆。剛道來傳法。還曾傳得無。

維摩

凜然夷齊之風。嶠然巢許之態。橫作竺乾之孽。崛起釋門之害。口吧吧地。說盡萬千。究竟不知有這一解。人皆謂。金粟如來。示現毗耶。我只道。病多諳藥性底。耆年婆羅門者也。

黃蘗斷際禪師

大機磅礴。大用縱橫。要掌便掌。大中天子。掌中突出。要棒便棒。濟北大樹。棒頭挺生。大唐國裏只一人。千古仰之日月明。

裴相國

咄這措大。極是叵耐。操我戈矛。入我疆界。撲滅圓覺大光明藏。瀝乾圭峯無邊義海。所至皆望風退衄。末後遭蘗山。和賊捉敗。納款投降。願為弟子。奉事無懈。

雪峯真覺祖師

弄出鱉鼻蛇。彈起廣陵曲。清韻難可掩。毒氣不可觸。瞻之不足聽不足。千古萬古福城福。

朝陽穿破衲

一條屈曲無絲線。半寸攣拳穴鼻針。補得完全成一片。舉頭紅日到天心。

對月了殘經

古教只知遮老眼。銀蟾不覺上孤峯。看來看到無看處。光境俱忘一卷終。

偈頌

廬中佛事

幾回走巷復穿衢。貨賣南方鎮海珠。一栲栳都傾出了。不知酬價有人無。

物外生涯

三十餘年海上遊。未曾容易下金鈎。等閑拋擲絲綸處。蝦鱉魚龍一網收。

松風度曲

大夫噫氣撼青冥。餘韻蕭騷入戶庭。遞到高山流水意。不知誰解眼中聽。

荷露跳珠

優曇初現葉團團。錯落明璣走碧盤。沉澁莫將魚目比。看時容易覓時難。

定翁

日用千差萬別中。如如不動等虛空。春妍秋靖幾更變。此老何曾改舊容。

古堂

過去威音佛已前。向虛空裏架椽椽。至今景定年之二。往却門風尚儼然。

鏡空

團團荷葉不相似。豁豁大虛難比倫。箇裏洞然無一物。擬於何處拂埃塵。

野航

遠泛飄然一葦輕。水天上下鏡無塵。自從碧眼胡歸後。著脚那知是甚人。

月浦

孤明歷歷曲彎彎。色與蘆花彷彿間。多是滿船空載去。幾人親得見珠還。

危峯

似側如欹杳靄間。冰稜劍刃不多爭。可中不是通玄頂。切莫羸心向上行。

懶牛

鼻繩拽脫了無拘。慵有餘兮頑有餘。芳草滿前渾不顧。眠雲臥月只如如。

南牕

百一十城煙水外。玲瓏八面自天開。等閑坐斷東西北。無限薰風拂拂來。

虛舟

內亦空兮外亦空。不施櫓棹不張篷。聽它東去又西去。誰管漫天鼓黑風。

坦翁

山未為高水未深。賤非泥土貴非金。自來一種平懷看。到老何曾有二心。

可山

三拜起來依位立。孤高不與眾峯齊。自從得髓歸來後。便見乾坤宇宙低。

寄雪竇希叟

舌本瀾翻千丈雪。眼青錦鏡一壺冰。瞎驢種草有如此。滅却凌霄正續燈。

寄天寧雪庭

一本凌霄秋後瓜。遲遲九月裏開花。霜前結子須彌大。壓倒東西浙五家。

看石田語

語言硬淨如生鐵。眼目高明爍太陽。今日江湖無此作。令人三嘆憶平羌。

送僧遊南嶽

一口盡吞三世佛。近來出世佛猶多。為吾問訊老思大。底事不能開口何。

吉州圓上人之浙

廬陵米價沒誦訛。半說低兮半說高。此話要圓緘却口。聽他江浙開嘈嘈。

瓊上人之杭

懷抱瓊瑤一段奇。通身富貴少人知。四藤擊碎還收拾。攤向皇都賣與誰。

風幡亮上人游浙

動在風幡動在心。集雲棒下已分明。而今百越三吳去。肯聽它家熱盃鳴。

月華崧上人之杭

月華如水夜沉沉。一曲簫韻韻更清。曲罷莫言無覓處。西湖後夜轉堪聽。

傳上人之吳

達磨西來有底傳。賺人掘地覓青天。況今楓落吳江冷。去去休容易泊舡。

暫到

騎鯨捉月莫辭勞。海角天涯打一遭。後夜再三撈攬得。碧天雲靜一輪高。

送曇知客歸感山

懶向人前送又迎。飄然去路一身輕。到家有問到家句。雨過瀟湘秋月明。

刀鐮黃陳二生

手持刀鐮謁桑門。叉手擎拳笑語溫。且說工夫精妙處。斷然毫髮不容存。

双手乖如双眼乖。等閑淨出頂門埃。幾多鐵額銅頭漢。總被渠農按過來。

禮疎山塔(二)

造塔當年事。喧傳直至今。示人千古意。與匠兩三金。不得羅山語。誰知矮叔心。
。瓣香來作禮。肯顧白雲深。

江橫一練平。山色四時青。水足柴猶富。人多爨不停。無絃猶自韻。有耳幾曾聽。
。槁矣齊簷柏。頻看涕忽零。

送孚藏主歸江西

雲臥胸中蟠萬卷。舌端筆端皆具眼。評今論古知幾何。寥寥百年骨不冷。有孫挺
特尤掀騰。富有蘊藉如弗能。韜光鑿彩事枯硬。不學乃翁牽葛藤。壁立萬仞出一語。
佛祖應無啟口處。有時一默淵且深。盡大地人難指注。脚尖踢倒凌霄峯。揮劒活屠潭

底龍。三條椽下四世界。破蒲團邊兜率宮。秋風忽起故山興。歸本無歸語何剩。江湖斫額應望君。莫作秤鎚落深井。

將赴雪峯。示圭上人

上人辭我去行脚。我亦早晚行脚去。天涯海角或重逢。鉢飯莖齏又相聚。自笑年登六十七。眼昏耳聾脚無力。觸事無能只面墻。百千追悔有何益。少壯學道宜加鞭。危亡不顧勇直前。如一人與萬人敵。破堅挫銳成萬全。放牛歸馬群務息。好是太平無事日。塞北歸鴻截霧飛。江南野水連天碧。

見侍者。乞語為入道蹊徑

入道蹊徑無蹊徑。日用現行何不省。和南問訊已乖張。應對賓朋曾不隱。同盂共飯況三年。話破那知萬萬千。今日炷香重覓語。許時聚首成徒然。老僧更不能忤怛。痛掌寧辭當面搭。從教負痛走出門。呼天怨罵。齒沒舌禿口未合。

題跋

跋妙喜與管盈叔居士頌

管公盈叔。居蘿湖。幸自不為藤蘿纏倒。無端誤入花木瓜林。惹得通身荊棘。江湖敏手。不能為之善解。從而加以爛葛。為蔓滋甚。予恐秀亦墮此。穎脫無繇。故揮以金剛王寶劍云。

跋古巖送徽妙峯歸南嶽偈

昔老妙峯。佩南堂正印。虎視諸方。而所居之剎。枯茅敗屋。僅庇風雨。人不堪其憂。而師獨安之三十年。不改其樂。予嘗升其堂。每以人境不侔為恨。今觀古巖贈其歸衡嶽之語。雖靈山授記。不是過矣。吁。

為龍維那。跋高原和尚煨髮頌

珠回玉轉。錯落金盤。高原和尚。示人之舍利也。龍維那。既能寶之。幸毋以豌豆魚目混之。乃善。

跋癡絕與嗣子明老法語。并書(明曾做維那)

養子不須教落賺。自然會累紙沓幅之語。何婆孀如是耶。當時。興化打克賓底主杖。幸自不在別人手裏。因甚放過。儻能盡令而行。則玉山今日未到如此。茲因郁禪人持來乞語。炷香展觀。殊為老叔惜。

跋中洲鄭居士佛牙舍利頌軸

佛牙舍利。世所希有。中洲藏之甚祕。皖翁訐露向人。雪峯一眾。讚之罵之。無非五綵畫虛空也。讚罵不及處。却請居士道。

為見侍者跋無準癡絕書

昔遊鐘阜凌霄之門。見其提唱。呵叱佛祖。不啻塵垢粃糠。今觀與南屏書。敬之愛之。雖祥麟瑞鳳不是過。但不知敬愛與呵叱孰是。見既寶此。當持以求頂門具眼者訂之。庶見二大老用處。迥出常情。不然。鼠聚乾薑何益哉。

跋佛鑑佛海法語後

予父兄。平昔多病。頗諳藥性。所說方子。雖各不同。點檢將來。皆經驗者。若依此修合。必無謬誤。若不依此修合。亦無謬誤。何故。纔形紙筆。已非妙訣也。韓子謂火其書。予於此軸亦云。

題谷源不無軒朱文公墨跡後

丁巳之夏。庚暑正隆。齋餘靜坐粟中世界。有大比丘名曰舟者。合掌而前曰。吾祖雲谷。與晦菴朱文公。為方外交。文公扁其軒曰不無。閱歲滋久。厥義未聞。願為宣說。予曰。坐。吾語汝。予非義學者。不無之義。又安能說。且以子舉此意。為此來扣我門。入我室。伸此問。謂非不無可乎。子。十二時中。折旋俯仰。嬉笑怒罵。語默動靜。應對進退。謂非不無可乎。三八五日。陞堂入室。鞠躬叉手。摳衣趨隅。目覩耳聞。心開意解。謂非不無可乎。文公未書。爾祖未揭。不無之名。已不可得而掩矣。子亦未舉。予亦未答。不無之義。已粲然在前矣。逮乎書而後揭。揭而後請。請而後說。不無為無。無為不無。紛然是非。殆將不可得而辨。欲求所謂不無。予未敢保任。候阿逸多出世。請往彼問。舟蹶然而起再拜曰。不無之義。得之矣。乞書以為證。於是乎書。

題佛照諸老墨跡後

雨霽初秋。風清萬壑。響春巖溜。香噴水沉。政爾橫刀而眠。有客扣門。呼童眎之。乃南浦元藏主也。稽首作禮。出示巨軸。與炷展觀。恍然如揖拙菴父子兄弟。覺範補之諸大老於座間。喜不覺舞。因謂之曰。一軸之作。字字句句。曲盡世出世間之妙。非今時藻繪語也。不知緊切為人處。子知之乎。元良久曰。直截根源。腳踏實地。無踰此矣。若夫斂容默照。湛寂無依。探淺深。輕去就。不過持身策也。予曰。然。但其間俗漢子道。荒山藏古寺。見旁水梅開一枝三四。予竊恠焉。子以為如何。元笑曰。將謂是个俗漢。既知如是。併宜寶之。

題群牧圖

雨過桃林草正肥。休征牧放恰相宜。擎頭戴角群然樂。喜見太平無事時。

題草虫圖

長莖短莖芳草翠。東个西个秋虫寒。平白祖翁田一片。時人莫作畫圖看。

小佛事

倫首座秉炬

六十八年。北山之北南山前。風清月白。南北絲毫元不隔。霹靂一聲。喪盡生涯無一星。崖崩石裂。螺江江水連天碧。這箇是月巖首座末後句子。山僧從而註破。還得相應也無。其或未然。重繫以詞。以火炬打圓相云。見麼。劫火洞然毫末盡。巖前依舊月輪孤。

月上座秉炬

見月休觀指。猶有月在。歸家罷問程。猶有家在。只如鳥啼月落。家破人亡時如何。通身是火通身水。烈焰堆中鼓怒濤。

則上座秉炬(元宵)

見成有則舊公案。抵死拈來翻覆看。啐地折兮曝地斷。上元定是正月半。因行掉臂。誤入長安。燈火燒空奪夜寒。

真上座入塔

皮膚脫盡。真實獨存。如珠似玉。輝乾輝坤。大地不可得而藏。無常不可得而吞。落在雪峯手裏。且道。如何折合。一分奉釋迦牟尼佛。一分奉多寶佛塔。

廣維那秉炬

以火炬打圓相云。祇這箇還會麼。廣大配天地。光明逾日月。佛眼覷不破。佛手遮不得。一槌百雜碎。何處尋蹤跡。擲下火炬云。石火光中明。

善上座秉炬

以火炬打圓相云。某人還會麼。只這便是不思善不思惡。父母未生已前本來面目。便恁麼領略得去。如睡夢覺。如蓮花開。如病得汗。如死得活。一得永得。更無退轉。雖然如是。擬議不來。火蛇燒面。

佳上座秉炬

脫屣仕途。致身林下。橫草不拈。豎草不把。去來自在。生死優游。烈焰堆中輓綉毬。

圭都寺秉炬

顧我老且曠。咨汝為肘臂。共扶破沙盆。建黃蘗宗旨。是事未究竟。燬變卒然至。我方歎一夢。汝已行千里。挽既挽不住。呼亦呼不起。將謂之何處。舉起火炬云。元來在這裏。打圓相云。見麼。鼻直眼橫。活卓卓地。高乘露地白牛車。火宅門前恣遊戲。

毒果因西堂秉炬

毒果之毒。非常毒類。栗棘蓬固不足儔。金剛圈亦難可擬。鼻著頂門。裂斷幾多衲子命根。覷著眼睛。枯抑又見鬻髓遍地。今其已矣。舉炬云。核子尚存。擲下云。

擲向亘天紅焰裏。從教毒氣滿乾坤。

自讚

小師惠林師孫法濟請

齒豁頭童。眼昏耳聾。不忘所嗜乾屎橛。未忍輕拋栗棘蓬。以此踞叢林。以此濟貧窮。只緣真實不脫空。故得孝子慈孫。寫真而繪容。

奇都管請

牧以卑。守以規。迅雷疾風。鐵石不移。須彌其頹。隻手力持。電光石火裏。驅耕奪食。春風和氣中。摧枯拉萎。極等沒意智。闔國少人知。知之。梓府牛峯奇。

小師惠彰請

顧我遊世間。如雲在天上。任緣而去住。不作去住想。南北信所之。東西無定向。為人少方便。動便攔腮掌。恁地去離泥水底本師。如何却喚作環溪和尚。

雪峯化士請

萋萋苴苴。瀟瀟灑灑。嚴冷時溫若陽春。徧急處寬踰大海。纔開口。平日說脫空。却嫌人。無事謗般若。有時突出一句鄉談。佛也不能覷他縫罅。從來閩蜀本同風。相逢自有知音者。

禪人請讚

赤土畫簸箕。冬瓜作碓觜。舂碎鐵蒺藜。簸出長粳米。不須淘汰。不須炊飽。盡世人人不知。

太白名山天童景德禪寺住持比丘普明校正

環溪和尚語錄卷下(終)

No. 1388-B行狀

師諱惟一。環溪其自號。資州墨池賈氏子。父寵母史。在娠中。屢有吉徵。及誕安詳。年甫十歲。里中大疫。師與母俱患。母疾革。撫師謂其父曰。吾兒雖幼。器質不凡。終不為人下也。可善眎之。尋有近邑梵業寺僧覺開。覩師奇相。求為童子。父忻然捨以事之。年十二。口使享泉張公。方至寺。見師穎悟。適暮夜。師張燈佛前。享泉屬對曰。燃燈識此燈。師即應云。指月知非月。享泉大喜。許以異日當鬻牒為子圓頂。既而從叔父巨源衡。甫讀書。及鄉先生鄭德厚遊。皆軒昂見頭角。遂習舉業。隨吏計偕。弱冠之年。享泉果以勅牒授師。遂棄所學祝髮。受具戒於成都甘露寺。繼而往凌雲謝享泉。泉勉令行脚。二十二。遊大慈講筵。知其未為究竟。於是。舍而謁晦菴光公于正法。訥堂辦公于六祖。土菴圭公于東林。皆往參決。晝夜孳孳。究明己事。一日因三江惠上人相訪。師問云。風性常住。無處不周。古人搖扇。意作麼生。

惠曰。一時與你說了也。師默然久之。送惠歸至大安門。道多福街而回。師自謂曰。古人搖扇意作麼生。警然有省。乃曰。大街拾得金。四鄰爭得知。喜不自勝。遂歸語土菴。菴曰。此乃楞嚴所謂見色陰銷。受陰明白。身心輕安。無慧自禁。悟則無咎。非為聖證。師於是。喜氣頓息。翌日。土菴室中問師。如何是佛。師提起坐具。菴曰。有坐具即從汝。無坐具時如何。師與劈曾一拳。菴托開曰。倒來這裏捋虎鬚。師云。未為分外。已而再從訥堂于六祖。土菴于正法。自是。言語相契。機緣脗合。二老皆擊節稱賞之。師以直指之學。盛於南方。遂問舟東下出峽。首抵公安二聖。未幾。去遊南岳。值無二月公。方入福巖。室中問師。什麼物恁麼來。師云不識。無二云。達磨來也。師便珍重。無二云。也得也得。師云。莫掩彩。無二笑而已。尋遊廬山入浙。道蘇湖至杭。聞佛鑑禪師住育王。道風遠播。乃絕江造玉几。時四方來學。雲趨水赴。求參堂者。或累旬月而不得。間有得者。如登龍門。師徑懷香。詣方丈相看。佛鑑顧師敦龐。識為法器。即日歸堂。眾皆驚訝。後入室。佛鑑問師。文殊是七佛之師。因甚出女子定不得。師對云。龍吟霧起。佛鑑曰。我問你。下界罔明菩薩。為什麼却出得女子定。你定道虎嘯風生。師曰。某甲不恁麼。佛鑑曰。你又作麼生。師云。虎嘯風生。佛鑑曰。蝦跳何曾出得斗。師復應云。和尚寧免疑著。佛鑑便打。數月後。俾師侍香。會佛鑑遷徑山。復命知藏。尋遊金陵。依癡絕冲公于鐘阜者二年。復歸徑山。遂令師首眾。淳祐丙午。建寧瑞巖虛席。太守待制楊公恢。命開元清溪誼老。舉有道行者主之。誼舉師中選。楊公。敦請開堂。瓣香供佛鑑。俄而經略宋公(茲)招師住蓮峯菴。未幾。遷臨江之惠力。又遷洪之寶峯。江西運判翁公(甫)陞師住黃龍。凡五年而退藏疎山。臨川守右司黃公(恪)請師住郡之北禪。不赴。繼而建昌郡守錢公(應孫)起師住資聖。漕使洪公(壽)遷師住筠之黃蘗。皆閱一年。而退歸感山。運使曹公(孝慶)復以洪之上藍延師。辭不應命。時袁之仰山虛席。直指堂舉師補處。省筭既下。師不可得而辭。凡閱五載。而遷福之雪峯。又五年。被旨遷四明天童。初天童。自石帆衍公歸寂。太傅平章魏國賈公。入演福飯僧。焦諸山公選。江湖禪衲。咸屬意於師。及鬪拈中。歡聲雷動。南北兩山衲子。挑包過東州。以徯其來者。無慮百數。叢林之盛。前此未之有也。居無幾。而寺忽丁回祿。師躬櫛風沐雨。分衛西州。得金錢累鉅。方規欲修復寺。雖變故之餘。安眾行道。猶不少懈。凡住持職。任所當為者。非疾病大故。未嘗暫輟。會至元更化。諸方風靡。折腰權門。師獨抗節不屈。故當時名公鉅卿。如庾使黃公(震)前永嘉郡守陳公(蒙)皆致書推稱之。己卯冬。師以老病謝事。退居東堂。先是。師於丙子秋感疾。遂命其徒。即寺之西偏。得穴地。築室數椽。以為歸藏之所。崗巒朝向。秀峙可觀。因取鄉里之白蓮峯。以名菴。以示首丘之意。辛巳秋九月旦。忽誠其徒。趣辦終焉計。越四日。索浴易衣。趺坐而逝。是日。天大風雨。雲陰晦冥。翌日天色開霽。四方會葬者踵相屬。觀者如堵。喪儀之盛。前此未有。龕留七日。其徒奉全身。葬于菴後之山。不違師意也。俗壽八十。僧臘六十。度

弟子若干人。嗣法若干人。南華可堂悟悅為上首。來者猶未艾也。師為人。骨相魁梧。音韻洪暢。面目嚴重。語不妄發。平居暇日。端拱默坐。眈眈虎視儼然。人望而畏之。每登狴座。握麈訓徒。如瓶瀉雲興。曾不滯礙。文質彬彬。聽者忘倦。室中尤無肯路。未嘗輕許。學者或有以偈頌呈見解者。必遭詬叱。無親無疎。無偏無黨。平生住持所得施利。隨得隨捨。其在東堂日。復罄所有。以分遺。同衣併捐。以助興建。餘僅取足後事而已。覺此嘗謂。佛鑑之道。如大龍普澍。一雨所潤。初無揀擇。而卉木藥草。隨其根性受益有異。今佛鑑之嗣。奉勅董大招提者。前後背頂相望。卓然在人耳目。至於因果明白。行解相應。宗說俱通。師可謂兼之矣。若夫應機說法。提唱宗乘。則備見於九會錄云。覺此。昔侍師側。師之出處。知之為詳。今猥以行實見屬。輒不撥荒。斐敬百拜稽首。直書其事。述而不作。將求當世之
大手筆者。刻諸金石。以昭示不朽焉。至元十九年 月 日。住秀州海鹽天寧禪寺。
嗣法小師覺此狀。

No. 1388-C

說法不應機。總是非時語。今觀環谿法兄九會錄。可謂是應機如雷霆。應時如雲雨也。始從篇首。終至卷末。子細點校將來。得非說法如雷如霆。如雲如雨者耶。故予當時執侍先師。見其瑞世。師遂鳴鼓集眾。以從上所傳三斤重底拄杖子。兩手分付。由是一向單提獨弄。儘有餘態。然後方顯。授之者。故不虛授。而受之者。亦不妄受耳。覽斯錄者。當於言外著眼。信知文不在茲乎。

至元癸未元正 住天童弟 (普明) 跋。

No. 1388-D

觀夫二帙。吾環溪老人。平日攬醍醐為毒藥底方子。西江閩浙。九坐道場。死盡衲子偷心。可勝計哉。其小師呂禪人。不憚三千里。持行狀來。求塔銘於 丞相杭翁。作夏三關。一日出以示余。且欲為著語。余曰。是錄丞相杭山已序其前。月坡鄉翁復跋其後。余何敢贅邪。既不得辭。於是。以五彩描寫虛空耳。後之中毒深者。請試閱之。倘或起死回生。則環溪老人。肉猶暖在。

癸未良月既望 住黃龍比丘 (覺性)書。